

wëllt hei eng Déclaration préalable aféieren, fir den Détachement ze verhënneren.

Ma dat war dat, wat deemools d'Gewerkschaften, d'Regierung an och d'Fédération des Artisans wollten. Elo schrauwe mer llicht zrëck.

Ech hunn awer e Problem, wann ech direkt llicht zrëckgeschrauft hätt. Da wärem erëm eng Kéier kujenéiert gi fir erëm eng Kéier zrëckzeschrauwen. Dat kann net dat sinn, wat mer wëlle maachen.

Duerfir meng Konklusiounen: Éischtens, wat d'national Gesetzgebung ubelaangt, hu mer kee Problem. Mir kréien dat riichtgebéit. An nach eng Kéier soen ech, ech sinn awer der Meenung, dass et richtig war, net dat riichtzebéien, ier mer condemnéiert goufen, well mir hätte jo kënnen da Saachen zrëckschrauwen, déi mer net hätte missen zrëckschrauwen. An et muss jo awer op d'mannst nach ee Land ginn an Europa, op d'mannst eent, wat awer wierklech versicht iwwert dat erauszegoen, wat allgemeng als Norm ugesi gëtt a wat e bësse méi kämpft. Quitte dass et dann och heiansdo verléiert.

Um nationale Plang hu mer weder wat d'Kollektivvertrág ubelaangt nach wat den Index ubelaangt Problemer. Dat anert sinn niewesächlech Punkten.

D'Kollektivvertrág, do ass et ganz kloer, dat ass deemools hei diskutéiert ginn, do gouf et eng grouss Oppositioun tëschent Chambre des Métiers a Chambre de Commerce. Nämlech huet d'Chambre de Commerce gesot, mir sollten net all Kollektivvertrág d'obligation générale eranhuelen. D'Chambre des Métiers, d'Chambre du Travail, d'Chambre des Employés privés, d'Regierung an d'Chamber waren der Meenung, mir sollen all Branchen eranhuelen. An dat ass richtig.

Et kënnen awer no der Direktiv nëmmen d'obligation générale Kollektivvertrág erakommen. Elo hu mir zu Lëtzebuerg spezifesch Situatiounen, déi domat ze dinn hunn, dass et Secteure gëtt, wou mer nëmmen ee Betrib hunn, wou e Kollektivvertrag ass. Do muss mer eis an deene Secteuren d'Fro stellen - an déi hunn ech de Sozialpartner gestallt -, ob mer net solle méi Kollektivvertrág d'obligation générale erklären.

Dat huet näischt mat der Direktiv ze dinn. Dat huet eppes mat eiser Praxis, gegebenenfalls souguer mat eisem Gesetz ze dinn.

Ech wëll och soen, dass ech d'Sozialpartner de 26. Juni gesinn hunn. Ech gesinn d'Gewerkschaften den nächste Méindeg. Ech gesinn d'UEL den nächsten Dënschdeg. An ech hu jo d'Chamberskommissioun gesinn, och als Consultatioun, de leschten Dënschdeg, an da kucke mer, déi Texter weider räifen ze loosse.

Ech bleiwen nach eng Kéier der Meenung, dass mer fir Lëtzebuerg kënnen de Schued verhënneren. Ech bleiwen awer och der Meenung, dass et wichtig war, dass mer bis zum Schluss gekämpft hunn, well mer nämlech elo e kloert Bild hunn, wou et higeet. An et ass jo duerfir, wou ech e Samschdeg bei de Gewerkschaften war, se empfangen hunn.

Obwuel et keng Auswierkungen op eis Lëtzebuurger Gesetzgebung huet, ass dat Uerteel a senger Definitioun vum Ordre social public national esou restriktiv virgaangen, dass déi bal net spilt. Dass eigentlech nëmmen déi minimal Bestëmmunge vum Artikel 3, Paragraph 1 spillen, an net den Artikel 3, Paragraph 9. An dat ass déi Fro, déi ech wëll op europäeschem Plang opwerfen.

Et ass duerfir, wou ech d'EU-Kommissioun schonn den 9. Juni opgefuert hunn, fir eng Analys ze maachen, wéiwäit elo d'Jurisprudenz steet par rapport zu der Volonté initiale du législateur. Et ass duerfir, wou ech de Xavier Bertrand gefrot hunn, fir driwwer ze diskutéieren, an ech wäert och en Donneschdeg dat zu Chantilly am Ministerrot thematiséieren.

D'Kommissioun huet iwwregens schonn eng éischt Äntwert drop ginn. Ufank Oktober wäert se e grouss Forum maachen iwwert déi Uerteeler, nodeem se sech laang geiert huet fir drop ze äntweren. Do huet d'Kommissioun awer elo trotzdeem relativ séier

reagéiert a gesot, kommt mir diskutéieren driwwer, wat ech e positive Punkt fannen.

An dann ass et esou wéi den Här Fayot gesot huet, deem ech Merci soen, grad wéi dem Här Glesener, dem Här Jaerling, well se wierklech hei d'Portée gutt verstanen hu vun deenen Arrêten. Wéi den Här Fayot gesot huet: Da muss mer kucken, wat d'Äntwert ka sinn.

Sozial Protokoll wësse mer, dass Lëtzebuerg, iwwregens Däitschland, d'Madame Merkel och, versicht haten dat ze thematiséieren beim Traité vu Lissabon, mer et net duerkritt hunn.

Et gëtt aner Méiglechkeeten. Et kann een eng Kommunikatioun vun der Kommissioun, et kann een eng Konklusioun vum Ministerrot, vun den Affaires sociales huelen. Et gëtt do eng ganz Partie Méiglechkeeten drop ze reagéieren. Fir mech ass et awer wichtig, dass mer elo emol eng Bewosstsäinsbildung maachen.

An deem Sënn war ech och frou, dass d'Gewerkschaften mobiliséiert hunn. Well de Problem vun engem Lëtzebuurger Aarbechtsminister am Ministerrot ass, dass e minoritär ass, wann en dat dote seet. Dat heescht, et ass scho wichtig, dass mer hei erkennen, dass et Problemer gëtt an dass mer versichen deem entgéintzewierken. Woubäi ech och dat soen, wat de Marcel Glesener gesot huet, nämlech dass, wa mer den Traité hu vu Lissabon mat enger Sozialklausel, déi horizontal ass, een och erëm eng Kéier méi Méiglechkeeten huet, hei virzebeugen, wéi ouni.

Et ass opgrond vun deene Saachen, dass ech de Blâme - wann Dir wëllt hei e Blâme géint mech ausschwätzen, well ech net mat der Kommissioun eens gi sinn - gären unhuelen, well ech der Meenung sinn a bleiwen, et war net dru mat der Kommissioun eens ze ginn. Et war hei drëm gaangen, an et geet och an Zukunft drëm, fir méi e sozialt Europa ze kämpfen an net de Minimum ze akzeptéieren.

Ech soen lech Merci.

» **Plusieurs voix.** - Très bien!

» **M. le Président.** - Merci, Här Minister. Mir si konfrontéiert mat enger Resolutioun, déi déposéiert ginn ass vum Här Henckes.

» **M. Jacques-Yves Henckes (ADR).** - Här President, ech wëllt eng Prezisioun ginn. Dee Blâme ass net, well de Minister net en Accord gesicht huet. De Blâme ass, well de Minister iwwerhaapt keng Äntwert ginn huet. Dat ass de Blâme!

» **M. le Président.** - Här Minister, Dir hutt d'Wuert.

» **M. François Biltgen, Ministre du Travail et de l'Emploi.** - Et gëtt an der Prozedur virum Europäesche Geriichtshaff zwee Momenter. Dat eent ass de Précontentieux, ier dass een ugesicht gëtt, an duerno gëtt een ugesicht. Am Précontentieux gëtt een eng éischte Kéier ugeschriwwen, an da kënnt den Avis motivé.

Wéi mer ugeschriwwen goufen, hu mer all eis Argumenter gesot, a beim Avis motivé sinn eis och keng aner Argumenter agefall. Well mer der Meenung waren, dass mer sollten opgrond vum Prinzip vum Ordre public, social, national géint d'Kommissioun kämpfen.

Déi eenzeg Äntwert, déi mer hätte kënnen ginn, dat ass ze soen, d'Kommissioun huet op deem an deem Punkt Recht, mir ginn lech no. Dat wollte mer net.

Dat huelen ech gären op d'Kap vum Aarbechtsminister a vun der Regierung. Dozou stinn ech nach haut an ech bleiwen der Meenung, dass, wa mer gäre méi e sozialt Europa hätten, mer och méi kämpfe mussen, an net manner.

» **Plusieurs voix.** - Très bien!

» **M. le Président.** - Mir si konfrontéiert mat enger Resolutioun. Déi huet de Moment nëmme véier Ënnerschrëften. Här Jaerling, Dir hutt d'Wuert.

» **M. Aly Jaerling (Indépendant).** - Här President, an der Prinzipiëfro ginn ech déi Ënnerschrëft fir den Dépôt, well ech der Meenung sinn, dass jiddferen, deen hei eppes wëllt deponéieren, soll d'Recht hunn, dat ze maachen, och wann ech net mam Inhalt d'accord sinn. Mä hei geet et ëm den Dépôt an ech mengen, jiddferen heibanne soll déiselwecht Rechter kréien.

» **M. le Président.** - Très bien. Här Gibéryen, wann ech gelift.

» **M. Gast Gibéryen (ADR).** - Här President, ech wollt just froen, firwat datt déi Resolutioun nach net verdeelt ginn ass.

» **M. le Président.** - Déi gëtt elo direkt verdeelt.

» **M. Gast Gibéryen (ADR).** - Ma wéi konnten d'Kollegen da wëssen...?

» **M. le Président.** - Majo, mir stëmmen eréischt of iwwert d'Resolutioun, Här Gibéryen, wa jiddferen heibanne konnt Kenntnis huele vun där Resolutioun. Da stëmme mer driwwer of. Maacht lech keng Suergen.

Bei enger Resolutioun, déi de Moment nach net ricevabel war, wollt ech emol ofwaarden, ob se iwwerhaapt ricevabel ginn ass fir se auszedeele. Si gëtt elo direkt ausgedeelt.

» **Une voix.** - Très bien.

» **M. Gast Gibéryen (ADR).** - Här President, erlaabt mer, datt ech awer net domadder kann averstane sinn. Well nach all Kéiers, wann hei eng Motioun oder eng Resolutioun deponéiert ginn ass, ob se vun engem oder vu fënnf Ënnerschriwwen war, se verdeelt ginn ass. Mir hu schonn dacks Kollege gehat, déi eng Motioun hei deponéiert hunn, wou just eng Ënnerschrëft drop war, fir datt déi aner och da kënnen Ënnerschreien. Dann ass se verdeelt ginn. Wéi soll dann ee kënnen soen, e géif se ënnerstëtzen a seng Ënnerschrëft drop ginn, wann e se net virleien huet?

Ech halen also drop, datt an Zukunft, wann eng Motioun oder eng Resolutioun hei deponéiert gëtt, se verdeelt gëtt, well et steet néierens an eisem Reglement, datt musse fir d'Veerdele fënnf Ënnerschrëften drop sinn.

» **M. le Président.** - Här Gibéryen, mir kucken d'Reglement no. Mir hunn dat ëmmer anescht gehandhaabt, mä mir kënnen eis och un d'Reglement halen.

Dir Dammen an Dir Hären, mir komme spéiderhin op déi Resolutioun, déi elo ricevabel ass, zrëck, wa se ausgedeelt ass a wa jiddferen konnt Kenntnis dervun huelen. Mir kommen elo zum nächste Punkt vun eisem Ordre du jour. Dat ass de Projet de loi 5733 iwwert d'Formation-recherche.

D'Wuert huet de Rapporteur, den honorabelen Här Thiel.



**5. 5733 - Projet de loi relatif aux aides à la formation-recherche modifiant:**  
**- la loi modifiée du 31 mai 1999 portant création d'un fonds national de la recherche dans le secteur public;**  
**- la loi modifiée du 9 mars 1987 ayant pour objet:**  
**1) l'organisation de la recherche et du développement technologique dans le secteur public;**  
**2) le transfert de technologie et la coopération scientifique et technique entre les entreprises et le secteur public;**  
**- le Code du Travail**

***Rapport commun de la Commission de l'Enseignement supérieur, de la Recherche et de la Culture et de la Commission du Travail et de l'Emploi***

» **M. Lucien Thiel (CSV), rapporteur.** - Merci fir d'Wuert, Här President. Kollegen -innen a Kollegen, eigentlech ass et fir sech ze schumen. Do gi mir Lëtzebuurger an allen internationale Statistiken als dat Vollek ausgewisen, dat am meeschte pro Kapp verdéngt, mä dat, wat mir eis mat deene ville Sue leeschten, schéngt net ëmmer dee richtige Choix ze sinn. Wuel si mir eis an de grouss Rieden ëmmer eens, datt de beschten Investissement hautdësdays deen an d'Kompetenz ass, dat heescht an d'Ausbildung vun eiser Jugend an an d'Innovationskraaft vun eiser Ekonomie. Wann et awer ëm d'Praxis geet, dann hu mir kaum Grond fir ze téinen.

Datt mir an de PISA-Enquëten nach ëmmer hannendrkludderen, ass gewosst. An datt eis Efforten a puncto Fuerschung och ze wënschen iwwreg loosse, dat weist eis d'Statistik. Am Duerchschnëtt ginn déi europäesch Länner 1,84% - dat sinn d'Zuele vun 2006 - vun hirem PIB fir d'Recherche aus. Eis däitsch Nopere sinn d'Championë mat 2,21%, wat dann och vläicht zum Deel deenen hir ekonomesch Force erklären dierft. Mir Lëtzebuurger

lande bei knapps 1,47% a leien domat zimlech um Wupp, wann een emol vun den neie Memberlänner am Osten ofgesäit.

Natierlech gëtt et Erklärungen duerfir, firwat mer esou schlecht ofschneiden. Wuel gëtt bei der Good Year zu Colmar-Bierg säit Laangem äifreg a gutt gefuerscht, a wuel hu mer säit den 80er Joren eng Rei vu Centres de recherche publics, Tudor, Lippmann an esou weider, déi ganz wäertvoll Entwécklungsarbecht maachen, mä dat wier et dann och scho gewiescht. Eng richtig Uni, ouni déi et keen zolitte Kader fir d'Fuerschung ka ginn, hu mer eréischt säit knapps fënnf Joer, an entspriedend bescheiden ass deemno bis dohinner eis R&D-Bilanz, Recherche an Développement-Bilanz, an och den Engagement vu finanzielle Mittelen ausgefall. Duerfir ass eis Statistik esou wéi se eben nun emol ass.

D'Europäesch Unioun huet sech bekanntlech e ganz ambitiëst Zil gesat, wéi se sech virun aacht Joer mat hirer Lissabon-Strategie virgeholl huet, bis 2010, dat ass net méi laang, de Champion an der Innovatioun an och an der Wëssensgesellschaft ze ginn. Duerfir misste mir dann och déi finanziell Efforten am Beräich vun der Fuerschung an der Entwécklung bis op 3% vum PIB héichpushen, well et anescht net méiglech wier, dee Kader an déi Konditiounen ze schafen, déi et Europa erlabe géifen, mat un d'Spëtz ze kommen. Wat net grad evident ass, wann engem eng gutt hallef Millioun Fuerscher feelen, well déi Bescht vun hinnen d'Konditiounen fir hir Aarbecht besser an Amerika wéi heiheem fannen.

Europa hat an huet nach haut, zwee Joer virun der Échéance, e Retard a puncto Fuerschung a riskéiert net nëmmen d'Amerikaner net erëmkreien, mä och nach vun anere grouss Länner iwwerdubbelt ze ginn. Da wier den Dram vun der dynameschster a gescheitster Weltregioun wuel definitiv ausgedreemt. Mir Lëtzebuurger hunn, wéi gesot, bis elo net grad dozou bägedroen, fir déi europäesch Moyenne no uewen ze drécken. Mä dat soll elo anescht ginn, an zwar dank zousätzlechen Efforten, déi gemaach ginn, fir den Openthalt vun de Fuerscher bei eis méi attraktiv a méi interessant ze maachen.

Bei deene Fuerscher, vun deene mir hei schwätzen, geet et virun allem ëm déi, déi un hirem Doktorat schaffen oder hir Fuerschungsaktivitéit duerno doriwwer eraus weiterféieren. Et sinn déi Doktoranden a Postdoktoranden, déi, natierlech encadréiert vun de Professeren, d'Fuerschung op enger Uni a Schwonk halen. Elo ass et awer net esou, wéi wa mir bis dohinner guer näischt fir dës Kategorie vun Zäitgenosse gemaach hätten.

Mir hu säit 1987 e System vu Bourssen, déi Bourses de formation-recherche heeschen an déi deemools am Kontext vun de Centres de recherche publics agefouert goufen. Si sollen net nëmmen, awer notament de frieme Chercheuren hëllef, hiren Openthalt zu Lëtzebuerg ze finanzéieren, a ginn haut vu ronn 130 Studenten am Joer beusprocht.

Am Joer 2000 gouf e Gesetz gestëmmt, dat eng Rëtsch vun Hëllef fir d'Studente virgesäit. Déi Hëllef sinn allerdéngs net op d'Doktorande limitéiert, mä si stinn allen Unisstudenten op, entweder a Form vu Bourssen oder vu Prëten. Heivunner kënnen ënner Ëmstänn och d'Chercheure profitéieren. Mä den eigentlechen Zweck vun deene Bourssen a Prëten ass deen, de Studente generell den Zougang zu den Unisstudien ze erliichten.

Schliesslech ass dann och nach en drëtt Instrument derbäikomm, dat dës Kéier exklusiv de Fuerscher virbehalen ass, well et sech op déi finanziell Ënnerstëtzung vu Rechercheprojete konzentréiert an duerfir och „Fonds national de la recherche“ heescht. Dee Fong huet am Ufank d'Boursse vun engem europäesche Fuerschungskonsortium verdeelt, dee sech der Informatik an der Mathematik verschriwwen hat. En huet duerno seng Ënnerstëtzung op déi Akademiker ausgedehnt, déi op wëssenschaftleche Konferenzen optrieden oder déi hir Doktoratstheese publizéieren, an huet schliesslech virun annerhallwem Joer säi Programm ATTRACT lancéiert, iwwert deen haut ganz Fuerschungséquipé bei eis ënnerstëtzt ginn, déi sech mat engem bestëmmte Projet ofginn, virausgesat natierlech, dee Projet huet de Seege vum FNR, vum Fonds national de la recherche krit.

Et kann een deemno net behapten, et wier nach guer näischt bei eis geschitt, an d'Fuerschung géif wéi e Stéifkand vun eisen Autoritéite behandelt. Am Contraire, an der Tëschenzäit ass deen Arsenal vun Hëllef-instrumenter scho bal esou verwurrelt ginn, datt geschwënn nach just Spezialisten den



Duerchbléck hunn, mä net méi déi, fir déi d'Hëllef geduecht ass.

Bei deem Gesetz, dat mir haut stëmmen, geet et och ëm d'Ënnerstëtzung fir Fuerscher a Fuerschung, mä et handelt sech dës Kéier net nëmmen ëm Bourssen a Subsidien, mä virun allem ëm d'Paien. Dëst Gesetz féiert nämlech eng regelrecht Rémunératioun, mat allem Drum und Dran, vum Aarbechtsvertrag bis zur Sozialversicherung, fir Doktoranden a Postdoktoranden an. Si ginn domat zu Salariéen en bonne et due forme vun der Uni, vun de Centres de recherche publics oder och vun anerene Aariichtungen, déi e Fuerschungsoftrag hunn. E gutt Beispill an deem Zesummenhang ass eis Zentralbank, déi hir eege Fuerschungsaktivitéit entwéckelt huet an déi dann duerfir och an Zukunft vun deem neien Instrument wäert profitéiere kënnen.

Déi Paien, déi hei bezuelt ginn, sollen d'Fuerschung bei eis natierlech net nëmme fir d'Lëtzebuenger Doktoranden, mä och fir d'Auslänner attraktiv maachen. D'Basispai fir en Doktorand läit bei maximal 31.000 Euro, wuelgemierkt am Joer, op déi dann nach d'Supplément vum jeeweilegen Employeur oder vun deem sengen eventuelle Partner aus dem Privatsektor dropgeprafft kënnen ginn, esou datt ee bis op de Plaffong vu 54.000 Euro am Joer ka kommen. Bei de Postdoktorande läit d'Lat verständlecherweis nach e bësse méi héich, déi komme bis op 80.000 Euro am Joer.

Ofgewéckelt gi soll dat Ganzt vum Fonds national de la recherche, deem säin aktuellen „Joresëmsaz“ vun 80.000 Euro dann deemtsprechend klamme wäert. Et huet sech gutt getraff, datt bei deem heite Gesetz, dat net nëmmen den Héichschoul- a Fuerschungsmiister eppes ugeet, mä och den Aarbechtsminister, een an deeselwechte Minister am Coup ass.

Dat huet d'Saach méi einfach gemaach, an et huet an engems dem Minister d'Geleeënheet ginn, och alt emol e Punkt ënnerdaach ze bréngen, deem näischt direkt mat der Fuerschung ze dinn huet. Een dovunner huet nawell fir Opreegung gesuergt a souguer de Statsrot dozou bruecht, sech Froen ze stellen. Dat ass déi an deem Gesetz agefouert Limite fir d'Studentenaarbecht. Well de Minister der Meenung ass, datt e Student an éischter Hisiicht e Student an net e Salarié an iergendengem Betrib ze sinn huet, war hien dergéint, datt e Student soll nieft senge Studië méi wéi zéng Stonnen d'Woch schaffen.

Déiselwecht Restriktioun fënnt sech iwwrengs am Immigrationgesetz, dat mir muer hei op der Lee hunn. Do soll ënner anerem verhénnert ginn, datt sech als Studente getarnten Drëttlänner-Bierger op eisen Aarbechtsmaart eraschläichen. An der Diskussioun an deenen zwou Kommissiounen, der Héichschoul- oder der Rechercheskommissioun, an der Aarbechtskommissioun huet sech dann erausgestallt, datt den Héichschoul- an Aarbechtsminister wuel kee Problem hätt, op 15 Stonnen eropzagoen, wann dat dann am Kader vun enger Joresreferenzperiod géif geschéien, déi d'Vakanzeméint mat abezitt.

Dat ass awer am Moment nach net méiglech, well déi Direktiv, déi eng Joresreferenzperiod erlabe wäert, eréischt an der Maach zu Bréissel ass. De Minister huet deenen zwou Kommissiounen, déi mat deem Gesetzesprojet befaasst waren, doropshi sai Wuert ginn, déi zéng Stonne Limite an deenen zwee Gesetzer - déi ech elo erwähnt hunn - op 15 Stonnen unzehiewen, soubal déi ernimmten Direktiv a Kraaft wier.

Deen Engagement, Här President, gétt dann och an enger Motioun festgehalten, iwwert déi déi zwou Kommissiounen am Bild sinn an déi ech lech elo iwwerginn.

#### Motion 1

La Chambre des Députés,

- *considérant que tant le projet de loi relatif aux aides à la formation-recherche que le projet de loi sur la libre circulation des personnes et l'immigration comprennent des dispositions relatives à la conclusion de contrats de travail à durée déterminée à raison de dix heures par semaine sur une période de référence mensuelle;*

- *considérant que ces dispositions s'ajoutent à celle prévue par l'article L.151-2 du Code du Travail concernant l'emploi des élèves et des étudiants durant les vacances scolaires et permettant la conclusion de contrats d'étudiants à raison de 40 heures par semaine pour une période de deux mois, mais sans affiliation à la sécurité sociale;*

- *considérant que le cumul des deux formes de contrats permettra aux élèves et*

*étudiants de travailler pendant 760 heures par année;*

- *considérant qu'il est établi scientifiquement qu'une durée de travail au-delà de 15 heures par semaine serait préjudiciable aux activités d'études, qui doivent rester le premier souci pour l'étudiant;*

- *considérant qu'une période de travail annuelle de 15 heures par semaine porterait le temps de travail maximal à 780 heures;*

- *considérant qu'une telle approche ne dépasserait pas sensiblement le temps de travail maximal actuellement envisagé, mais apporterait à la fois plus de flexibilité et une meilleure protection sociale à l'étudiant;*

- *considérant cependant qu'actuellement il n'y pas de base légale pour l'annualisation du temps de travail par voie d'autorisation ministérielle et que les dispositions communautaires en vigueur ne permettent pas l'introduction d'une telle base légale;*

- *prenant acte que la proposition modifiée de directive du Parlement européen et du Conseil modifiant la directive 2003/88/CE concernant certains aspects de l'aménagement du temps de travail adoptée en première lecture au Conseil EPSCO des 9 et 10 juin 2008 permettra la fixation par voie légale d'une période de référence annuelle;*

- *considérant encore que le Conseil d'État a relevé que les nouvelles dispositions n'empêchent pas expressément la conclusion de plusieurs contrats de travail dans le chef de l'étudiant;*

- *dans un souci d'équité, de clarté et de transparence;*

*invite le Gouvernement:*

- *à déposer, dès l'adoption définitive de la directive précitée, un projet de loi portant modification à la fois du Code du Travail, des dispositions législatives relatives à la libre circulation des personnes et à l'immigration, des dispositions législatives relatives à l'enseignement supérieur et à l'enseignement secondaire et disposant que tous les élèves et étudiants en âge de pouvoir travailler ne pourront conclure qu'un seul contrat de travail à durée déterminée avec un employeur, mais à raison de 15 heures par semaine sur une période de référence de douze mois et ce pour une durée ne dépassant pas cinq ans.*

(s.) Lucien Thiel, Ben Fayot, Gast Gibéryen, Jos Scheuer, Marc Spautz.

» **M. le Président** - Merci, Här Thiel.

» **M. Lucien Thiel** (CSV), *rapporteur*.- Här President, Kolleeginnen a Kolleegen, d'Wirtschafts- a mat hir och d'Wuelstandsgeschicht vun deem Land léisst sech an dräi Etappen opdeelen.

Déi éischt Etapp, während där d'Liewen iwwerhaapt eréischt liewenswäert zu Lëtzebuerg ginn ass a während där eis Virfahren déi ekonomesch Viraussetzunge geschaf hunn, fir datt mir als Klengstat iwwerhaapt iwwerliewe konnten, war déi, déi mir op eiser Minette opgebaut hunn. De Stol huet eis als Land liewensfäeg a räich gemaach an eis erlaabt, trotz eiser vergläichsweis butzeger Dimensioun mat deene Groussen um Dësch ze setzen a matzerieden.

Wéi gutt 100 Joer duerno d'Industriezéitalter bei eis ofgeklongen ass, war et just déi Souveränitéit an deen nationale Stellwäert, dee mir eis mat eise wirtschaftlechen Erfolleg geséichert haten, déi eis erlaabt hunn, eng vun deenen zéng gréisste Finanzplaze vun der Welt bei eis opzeriichten.

Säitdeem awer Europa ëmmer méi Realitéit gétt, an domat déi Souveränitéitsnischen ëmmer méi kleng ginn, mussen mir eis eppes Neies afale loossen, wa mir weiderhin un der Spëtzt bleiwe wëllen. Do gétt et awer keng 100 Méiglechkeeten. Eise Buedem gétt kee Rächtum méi hier an eis national Souveränitéit verblatz. Wat eis dann nach bleift, ass just dat, wat mir an de Käpp hunn. Et läit nëmmen un eis, ob mir déi Matière grise maximal asetzen, fir och weiderhin zu deene Beschten an deenen Erfolleg-räichsten ze gehéieren.

Duerfir brauche mir hell a gescheit Käpp, déi à même sinn ze fuerschen an natierlech och ze fannen, an domat eiser Ekonomie hiert Fëllement ze konsolidéieren an ze erweideren. Duerfir hu mir eng Uni gebraucht an duerfir brauche mir och dëst Gesetz, dat doduerch, datt et d'Fuerschen nach méi attraktiv bei eis mécht, eis Chance fir d'Zukunft verbessert.

Et ass an deem Sënn, Här President, datt ech am Numm vun deenen zwou Kommissiounen - där vun Héichschoul a Recherche an där vun der Aarbecht an der Beschäftegung - de Kolleeginnen a Kolleegen heibanne géif wäermstens recomman-deieren, dëst Gesetz ze stëmmen. Den

Accord vun der CSV-Fraktioun wëll ech heimat och scho ginn hunn.

Ech soen lech Merci.

» **Plusieurs voix**.- Très bien!

» **M. le Président**.- Merci, Här Thiel. Den éischten ageschriwwene Riedner ass déi honorabel Madame Brasseur.

#### Discussion générale

» **Mme Anne Brasseur** (DP).- Här President, den Här Thiel huet elo grad als Rapporteur e waarmen Appel un d'Deputéierte gemaach, dee Projet hei ze stëmmen. D'DP-Fraktioun wäert dee Projet och hei stëmmen. Mä éier mer dann zum Vote ginn an zur genereller Diskussioun, hätt ech awer nach e puer Bemierkungen zu deemem Projet de loi ze maachen.

„D'Recherche brauch Iddien, d'Recherche brauch Suen, mä d'Recherche brauch virun allem Chercheuren.“ Dat hat de François Biltgen, Minister vun der Recherche, hei op deser Tribün virun zwee Joer gesot, wéi mer den Débat d'orientation iwwert d'Universitéit an d'Politique d'Innovation et de Recherche zu Lëtzebuerg haten. Dat war den 20. Juni 2006.

Den Objet vun deenen Debatten deemools war eng Bestandsopnahm an eng Analys ze maache vun de Stärken an de Schwächte vun der Fuerschung hei zu Lëtzebuerg. Eng Bestandsopnahm, déi sech op eng Analys baséiert huet, déi vun der OCDE gemaach ginn ass, déi e Rapport am Virfeld zur Debatt ofgeliiwwert hat. Dëse Rapport ass genee analyséiert ginn, souwuel vun der Regierung wéi och vun der Chamber. An et ass net wéi mam leschten OCDE-Bericht, deen d'lescht Woch virgestallt ginn ass, wou d'Ministeren - an dat waren den Här Di Bartolomeo, den Här Krecké an d'Madame Delvaux - dee Bericht direkt zrëckgewisen hunn a gesot hunn, dat wier alles net richtig, wat an deem OCDE-Rapport géif stoen.

Hei, mat deemem Rapport iwwert d'Fuerschung, huet jiddferen dat geneestens analyséiert. Ech wëll elo net méi op deen Débat zrëckkommen, mä mir hu festgestallt, dass et eng grouss Identité de vue deemools ginn ass tëschent der Chamber, tëschent de Parteien an der Chamber an tëschent der Chamber an der Regierung. Ee Constat, deen ëmmer erëmkoum, dat ass, dass d'Fuerschungsarbecht zu Lëtzebuerg misst besser koordinéiert ginn.

Wann ee sech dee Rapport nach eng Kéier ukuckt vun der OCDE an och déi Motiounen, déi mer deemools ofgestëmmt hunn, dann ass wuel op deem Gebitt eppes geschitt, mä et bleift awer och nach vill ze maachen. D'Hausaufgabe sinn nach net all gemaach.

Et ass deemools festgestallt ginn, dass de Fonds national de la recherche seng Missioun als Coordinateur vun eisen nationale Rechercheaktivitéiten nëmmen deelweis géif erfëllen a laut OCDE misst och méi aktiv ginn. De Fonds national de la recherche war och net à même dat ze maachen, well seng Strukturen him dat net erlaabt hunn. Seng Aufgabe missten dofir méi kloer definéiert ginn. De Fonds national de la recherche kéint, der OCDE no, och op eng Berodungsaufgab zrëckgräifen, opbauend op seng Erfahrung, an zu engem richtige Conseil national de la Science ginn.

(M. Laurent Mosar prend la Présidence)

Ech wollt dofir de Minister froen, wéi wäit déi Iddi ass, fir aus deem Fonds national de la recherche e Conseil national de la Science ze maachen. Deem virleiende Gesetzesprojet no kritt de Fonds national de la recherche elo d'Gestioun vun den Hëllefprogrammer fir d'Formation-recherche confiéiert, wat och eng Recommandatioun vun der OCDE ass. Dat heescht, an Zukunft sollen all Ënnerstëtzungsaktivitéiten zugschte vu jonke Fuerscher beim Fonds national de la recherche konzentriert ginn.

Et sinn also nei Aufgaben, déi op dee Fong duerkommen. Et gesäit een och an deem Rapport, dee mer elo als Deputéiert zougestallt krute vun Fonds national de la recherche, den Annual Report 2007, dass de Fonds national de la recherche nei Strategien entwéckelt. Si schreiwe selwer: „We have readjusted our vision and strategy so as to organize our activities around three main objectives.“ Deen éischten ass, d'Chercheuren ze ënnerstëtzen, fir dass se eng wëssenschaftlech Qualitéit opbauen; zweetens, dass de Fonds national de la recherche soll dozou bäidroen, e favorablen Environnement fir d'Recherche ze schafen; an dat Drëtt, fir eng Culture scientifique hei zu Lëtzebuerg ze dévelo-péieren.

Et ass do, wou et wierklech nach hapert, an dat geet un an der Schoul. Ech sinn och frou, dass de Fonds national de la recherche elo zum Beispill d'Iddi lancéiert huet, fir am September eng Nuit des chercheurs ze organiséieren um Gebitt vun der Stad Lëtzebuerg - dat ass déi Woch no der Rentrée scolaire -, wou d'Leit all invitéiert ginn, d'Familljen, Individuë mat de Kanner kucken ze kommen, wat d'Recherche ass. Dat gétt hinnen op der Place publique méi no bruecht. De Fonds national de la recherche ass dofir ze félicitéieren.

Wann déi nei Aufgaben awer elo op hien duerkommen, da wëll ech de Minister froen, ob de Fonds national de la recherche dann och d'Moyenen huet, fir dat ze maachen. D'Moyenen, wat d'Leit ubelaangt. Dat heescht, hu se Leit genuch, fir dat do esou duerchezéien? De Ministère gétt entlaascht - wat jo eng gutt Saach ass -, mä ass de Fonds national de la recherche à même, déi Méibelaaschtung, all déi Aufgaben do ze maachen?

Dass mer méi Fuerschung hei zu Lëtzebuerg brauchen, do si mer ons all eens. Dat sot och de Fontagné a sengem Rapport 2004. E Rapport, vun deem mer am Moment net méi vill schwätzen. Et wier gutt, wa jiddferen vun ons sech dee Rapport heiansdo géif ënnert d'Lupp huelen, fir sech selwer emol ze rappeléieren, wat mer alles awer nach musse maachen.

Ech zitieren de Lionel Fontagné: „La première direction est de développer l'éducation supérieure et la recherche, domaine dans lequel le déficit du Luxembourg est considérable. Or, dans la société de la connaissance, un État pourra difficilement rester deux fois plus riche que la moyenne de ses voisins sans s'appuyer sur une forte éducation supérieure.“ Fin de citation.

De Plan national pour l'innovation et le plein emploi aus dem Joer 2005 setzt dann och den Akzent op d'Innovation an d'Recherche a geet op d'Wichtigkeet vun den Efforten an deenen Domänen vun der Kompetitivitéit an. Déi viiregt Regierung hat schonn decidéiert, d'Ausgabe fir d'Recherche eropzesetzen. Si war bei 0,08% fir op 0,3% vum PIB ze kommen. Zil vun der Lissabon-Strategie ass et, fir d'Joer 2010 bis zu 1% ze kommen. Mir schéngen awer do nach e gutt Stéck ewech ze sinn. 2006 ware mer bei 0,22%. Ech wollt de Minister froen, wéi d'Chifferen elo sinn. Déi hunn ech net fonnt.

Dofir, wann de Minister mer kéint soen, wéi d'Kontributioun elo ass, am Pourcentage vum PIB, wat d'Fuerschung ubelaangt, well déi vun 2006 leie jo e Stéckchen zrëck an et ass säithier en Effort gemaach ginn.

D'Fuerschung brauch also finanziell Moyenen. Si brauch och en ideaalt Ëmfeld, an op deem Gebitt bleift nach esou munches ze maachen: eng besser Koordination, méi en enk Zesummeschaffen tëschent öffentlechen Instituter an der Privatwirtschaft.

Mä d'Fuerschung brauch virun allem Fuerscher. Déi mussen sech och erëm an engem gënschtegen Ëmfeld erëmfannen an déi néideg finanziell Ressourcen hunn, fir hir Fuerschung ze bedreiwen, mä och fir ze iwwerliewen. Et gétt e puer Idealisten, déi Fuerschung maache just wéinst der Fuerschung, mä et muss een awer e Minimum hunn, fir kënnen eenegermoossen dezent dovun ze liewen. Déi puer Idealisten, déi hunn all meng Bewonnerung, mä dat geet net duer fir dorop e Fuerschungsstanduert opzebauen.

Déi Leit, déi Fuerschung bedreiwen, brauchen also Zukunftsperspektiven a si müssen och kënnen gesinn, dass se Débouchéen hunn. Well mir héieren oft, dass et Recherchë gétt, wou de Chercheur d'Recherche ophält, well en dann op den normalen Aarbechtsmaart geet, well hie sech et einfach net méi ka leeschte virunzufueren, well en déi finanziell Moyenen net huet.

Esou dass mer favorabel Konditiounen musse schafen, an dat soll jo elo mat deemem Gesetz geschéien. Well d'Bourssen, déi solle jo elo an Aarbechtskontrakter ëmgewandelt ginn, wou d'Couverture sociale mat dran ass. Et kann een nämlech net engem just d'Bourssé ginn an en huet keng Sécurité sociale. Dat soll jo och heimat







Dat Gesetz, wat mer haut stëmmen, gehéiert zu deenen Ustrengungen. Et passt déi bestehend Strukturen un d'Erkenntnisser an d'Besoinen un. D'Erkenntnisser sinn déi, déi d'OCDE ons 2006 an hirer Analys vun der Lëtzebuerger Innovationspolitik geliiwwert huet. Déi Analys inspiréiert sech un den internationalen Normen a Kritäre vun enger moderner Recherche an ass dofir de richtegen Ausgangspunkt, besonnesch fir d'Evaluatioun vun deem, wat an der öffentlecher Recherche zu Lëtzebuerg vir sech geet.

Ech weess, d'OCDE huet net dee beschte Ruff zu Lëtzebuerg mat hiren Analysen, mä et kann een op dësem Gebitt op jidde Fall soen,...

**(Interruption)**

Ech schwätzen elo vun dësem Gebitt.

...dass am Fong geholl hir Bestandsopnahm vun 2006 richteg an nëtzlech war. Déi ass jo och deemools gemaach ginn an Zesummenaarbecht mat villen Acteuren, mat der Chamber, mat Acteuren an der Wirtschaft an aneren an der öffentlecher Politik. Si huet deemools Feelentwécklung gewisen, wéi zum Beispill d'Gefor vun der Dispersioun vun de Responsabilitéiten. Well d'Recherche haut modern ass, wëllt dofir d'Politik, wëllen d'Ministère jo alleguer eppes domat ze dinn hunn; also d'Noutwendegkeet ass do, fir déi Demanden ze bündelen, zesummenzeféieren, fir iwwert d'Festungen eraus zesummenzeschaffen.

Eng aner wichteg Iddi och an där Analys ass, esou wäit wéi méiglech autonom Strukturen ze schafen, d'Bürokratie op e Minimum ze reduzéieren a vill Flexibilitéit ze halen. Dofir d'Iddi, dass déi öffentlech Hand mat Vertrieeder vun der Fuerschung an der Wirtschaft zesummeschafft.

D'Uni ass autonom, de Fonds national de la recherche ass en Établissement public, d'CRPen ebenfalls. D'Gouvernance muss esou sinn, dass wuel de Stat als wichtige Geldgeber Orientatioune ka ginn, mä dass d'Eegeliwe vun de Fuerschungsstrukturen op allen Niveaue méiglech ass an d'Bürokratie op e Minimum reduzéiert gëtt.

De Lëtzebuerger Modell vun der Fuerschung ass rezent. Dofir ass en nach dynamesch, verglach mat deem vu grouse Länner ronderëm, déi vill méi hunn, fir risegrouss Strukturen erëm e bësse méi flexibel ze maachen.

Eng Haaptsuerg - dat war eppes, un dat ech mech nach ganz gutt erënneren - beim Gesetz vun 1987 war absolut, eng fonctionnariséiert Recherche ze verhënneren. Dat heescht, ze verhënneren, dass duerch e feste Statut op Liewenszäit d'Fuerschung no kuerzer Zäit kee Rendement méi hätt. Dat war deemools akzeptabel, well vill Fuerscher nach en anere Beruff doniewent haten an domat ofgeséichert waren. Mat der Zäit huet sech awer gewisen, dass d'Précaritéit weder sozial nach fir d'Fuerschung selwer eng Léisung war.

Dofir ass eng wichteg Neierung vun onsem Projet haut d'Méiglechkeet, e Contrat à durée déterminée an der Fuerschung bis 60 Méint ofzeschléissen. Dëst ass eng gutt Mesure fir d'Précaritéit an der Recherche ofzebauen. De Chercheur weess zwar, dass hie flexibel muss sinn an dass hie sech op ville Plazen erëmdreie muss, mä och de Fuerscher huet iergendwann eng Famill an huet Kanner a wëllt eng gewëssen Aussicht op d'Zukunft.

Natierlech ass mat dëser Mesure net all Problem vun Fuerscher geléist. Ee jonke Mënsch, dee säin Doktorat mécht, oder e Fuerscher, deem nom Doktorat weiderfuerscht, also e Postdoc, sicht iergendwann e Point de chute, wou hie sech installéiere kann. Nu wësse mer, dass d'Méiglechkeeten dofir zu Lëtzebuerg rar sinn. D'Uni Lëtzebuerg trennt sech vun hiren Doktoranden, wa se fäerdeg sinn.

Wat fir aner Méiglechkeeten et fir Fuerscher gëtt hei zu Lëtzebuerg, wëll ech mat engem Fragezeeche versinn. D'CRPe bleiwen eng Méiglechkeet, oder Betriber, déi Fuerschung maachen, mä d'Betriber rekrutéieren international an net nëmmen hei um Marché. Da bleift eng Carrière am Ausland. Mä d'Entwécklung vun engem dynamesche Fuerschungsbetrieb - an dofir misste mer ons doriwwer emol eng Kéier ganz seriö Gedanken maachen - hänkt och vu Carrièresméiglechkeeten zu Lëtzebuerg of, wa mer eng Kéier nom Doktorand, nom Postdoc Leit hunn, déi an der Fuerschung geschafft hunn, déi sécher wa se jonk sinn och déi beschte Viraussetzung hunn, fir gutt Fuerschung ze maachen, mä déi awer och eng Kéier eng Carrière wëllen hunn, also eng gewësse Stabilitéit an hirem Liewen.

Här President, eng weider wichteg Ännerung vum Gesetz ass déi erweidert Kom-

petenz fir de Fonds national de la recherche, fir d'Bourses de formation-recherche an d'Aides à la formation-recherche fir d'Doktoranden an d'Postdoktoranden ze verdeelen. Dat ass eng gutt Mesure, déi fir Transparenz an Effikassitéit suerge wäert. Si entsprécht genee der Recommandatioun vun der OCDE, fir de Fonds national de la recherche op seng wesentlech Aufgab, nämlech de Finanzement vu Projeten, ze konzentréieren.

Duerch déi nei Orientatiounen, déi de Fonds national de la recherche sech iwwert d'Foresight-Etüd ginn huet, si seng Programmer gestrafft a preziséiert ginn. De CORE-Programm huet als Objektiv, d'Qualitéit vun der öffentlecher Fuerschung zu Lëtzebuerg a speziell cibléierte Beräicher ze verbesseren.

Eng wesentlech Recommandatioun vun der OCDE war, den Acteure vun der Fuerschung zu Lëtzebuerg duerch Contrats de performance op e puer Joer eraus hir Missioun an hir Strategie festzeleeën. An dat ass jo viru kuerzem geschitt fir de Fonds national fir d'Period vun 2008 bis 2010.

Här President, nach e Wuert zur Fuerschungslandschaft insgesamt. D'CRPen, déi d'Gesetz vun 1987 geschaf huet, bleiwe selbstverständlech selbstänneg bestoen. Et ass gutt nach ëmmer an der Landschaft, wéi mer se haut hunn, wann tëschent Uni a CRPen eng gewëssen Emulatioun bleift. Mä tëschent UNI a CRPe muss op d'mannst eng Koordinatioun stattfannen. Dat ass besonnesch wichteg um Plang vun der Personalpolitik, wat d'Carrièren an d'Ufankgehälter ugeet.

D'Uni huet duerch hir Politik d'Präisser fir Wëssenschaftspersonal zolidd an d'Luucht gedriwwen; an do kommen d'CRPen oft net méi mat. Wann een natierlech vu Fuerschungslandschaft schwätzt, muss een och wëssen, dass et och nach aner Instituter gëtt, wéi d'Ceps, Statec an esou weider.

Et schwätzt een - dat ass e weideren Aspekt, deem een och muss zu Lëtzebuerg héchstwahrscheinlech ausbauen - vum Environnement, vum ganzen Ëmfeld vun der Fuerschung; besonnesch wann et drëm geet, auslännesch Fuerscher kommen ze loossen, hinnen ze hëllefe sech ze installéiere mat hire Familljen, wann et muss sinn.

D'Uni huet sech Instrumenter dofir ginn a mécht dat. Mä d'Fro stellt sech: Wéi ass et mat deene Fuerscher vun aneren Instituter, vun de CRPen, déi vu bausse era kommen? Dofir hu mer net onbedéngt nëmmen als Stat, mä och als Gesellschaft nach Efforten ze maachen. Ee symbolescht Element dovunner ass d'Iddi vun de Studentewunnege bei de Leit doheem, wou mer am Fong geholl nach net deem Duerchbroch fonnt hunn. Mä ech schwätzen hei vum Ëmfeld, wéi mer mat héich qualifizéierte Leit ëmginn, déi zu Lëtzebuerg sollen installéiert ginn.

Wann ee vu Koordinatioun schwätzt, dann handelt et sech besonnesch ëm Ministèren, ëm hir Strukturen. Do läit mer wierklech um Häerz, Här President - ech wëll dem Minister dat hei soen -, d'Fuerschung zu Lëtzebuerg huet jo vill Pappen an och Mammen, déi een zesumme muss bréngen, fir dass déi Fuerschung eppes ervirbréngt. Dofir wollt ech d'Regierung félicitéiere fir dee viru kuerzem virgestallte Projet tëschent dem Héichschoulminister, dem Wirtschafts- an dem Gesondheetsminister mat amerikanesche Fuerscher a Privatfuerschungsbetriber. Ech fannen deem exemplaresch, fir eppes opzebauen, souwuel duerch déi Internationalitéit, mä och duerch déi Zesummenaarbecht vu Ministèren, vu verschiddenen Deeler vun der Lëtzebuerger Politik.

Här President, fir ofzeschléisse wëll ech soen, dass meng Fraktioun selbstverständlech dëst Gesetz wäert stëmmen. Si begréisst d'Aarbecht vun der Regierung um Gebitt vun der Fuerschung. Sécher däerfe mer ons net op de Lorbeeren ausrouen, well Fuerschung an Intelligenz ass par définition eppes Onroueges, eppes Wibbeleges, an de Confort an d'Certitudé sinn net fir d'Fuerschung.

Merci.

» **Plusieurs voix.** - Très bien!

» **M. le Président.** - Ech soen dem Här Fayot Merci an als nächste Riedner ass den Här Claude Adam agedroen. Här Adam, Dir hutt d'Wuert.

» **M. Claude Adam (DÉI GRÉNG).** - Merci, Här President. Dir Dammen an Dir Hären, ech wëll fir unzefänken dem honorerabelen Här Thiel Merci soe fir säi mëndlechen a schrëftleche Rapport. Et war och fir mech ganz flott ze héieren, dass all Riedner sech fuerschungs- a recherchefrëndlech ausgedréckt hunn an ech wäert

dat och maachen. Obschonn ech net, wat deem heite prezise Projet de loi betrëfft, de selwechten Enthusiasmus bis zum Schluss kann duerchhalen.

Am Résumé kann ee soen, dass d'Zil vun dësem Projet de loi 5733, dee mer haut debattéieren, ass, fir e Kader ze schafen, fir méi jonk Chercheuren, Lëtzebuerger an Netlëtzebuerger, an d'Land ze kréien an de Beruff vum Chercheur méi attraktiv ze maachen.

D'Ziler vu Lissabon ginn ernimmt, wou mer jo bekanntlech sollen 1% vum PIB duerch d'öffentlech Hand an 2% duerch de Privatsektor an d'Recherche investéieren. Et gëtt och nach un d'Ziler vum Plan national pour l'innovation et le plein emploi erënnert, wou mer wëlle bis 2010 op d'mannst zéng Chercheuren op 1.000 Aarbechtsplaze kréien.

Mir hunn eis Ziler héichgestach. Et däerf ee skeptesch sinn, ob mer se wäerten erreechen, mä mir sinn um gudden Wee. Mir maache Fortschrëtt. D'Richtung stëmmt. D'Vitesse de croisière ass vläicht net ëmmer esou schnell wéi mer eis se géife wënschen, mä och d'Entwécklung vun der Héichschoullandschaft brauch Zäit, fir sech nohalte ze organiséieren an ze entfalen.

Mir brauchen also méi Doktoranden a Postdoktoranden, natierlech virun allem op deene Gebidder, déi mer als prioritär ugesinn.

Mir wëllen duerfir besser Aarbechtskonditiounen fir eis Wëssenschaftler schafen, am Aklang mat der Charte européenne du chercheur an dem Code de conduite pour le recrutement des chercheurs. Mir wëllen d'Mobilitéit fördern tëschent de Länner, mä och tëschent den Héichschoulen an de privatwirtschaftleche Betriber. Mir leeë Wäert op eng gutt Qualitéit. Mir wëllen en Netzwierk schafen, wou d'Chercheuren an aner Wëssenschaftler zesummefannen.

Mat den Ziler vun dësem Gesetz kënne mir selbstverständlech och nëmmen d'accord sinn. Wat maache mer dann elo, fir dës Ziler ze erreechen?

Mir wëllen, dass d'Aarbechtsverhältnis vun de Chercheuren vun Ufank un duerch en Aarbechtskontrakt geregelt gëtt, dann ass d'Affiliatioun un d'Kranken- a Pensionskeess automatesch geregelt, da ginn och d'Ufankscarrière fir Chercheuren méi interessant.

Dat ass eng Condition nécessaire, fir dass jonk Leit mat Universitätsdiplomer eng Carrière an der Recherche kënnen upeilen. Ob et eng Condition suffisante ass, dass d'Recherche esou attraktiv genuch gëtt, fir sech mat hirem Contrat à durée déterminée géint esou interessant Beruffer mat Contrats à durée indéterminée, wéi mer se zum Beispill am Enseignement hunn, duerchzesetzen, dat bezweifelt mer; an do kommen ech zum Schluss vu menger Ried nach eng Kéier drop zrëck.

D'Durée vun der Hëllef fir d'Formation doctorale gëtt op maximal véier Joer équivalent plein temps limitéiert. Dat ass an anere Länner anescht. Besonnesch an den USA ass deem Zäitraum méi laang. Am Kader vum Prozess vu Bologne geet awer nëmme Rieds vun dräi Joer. Hei soll eng Evaluatioun vun den Erfahrungen, déi gemaach ginn, dann zu enger eventueller Upassung vun dem Zäitraum vun den Hëllef kommen. Nom Doktorat kënne mer nach weider zwee Joer Studië finanziell ënnerstëtzen.

Dat neit Gesetz ass also eng däitlech Verbesserung, well bis elo ware just dräi Joer finanziell Ënnerstëtzung méiglech.

Mam neie Gesetz kann ee Chercheur, dee schonns vun enger finanzieller Hëllef fir eng Dokteraarbecht profitéiert huet, och nach eng Bourse fir postdoktorale Studië kréien, wann en dës Studien an engem anere Land mécht a wann en dës Studien innerhalb vun acht Joer no sengem Doktorat ugeet.

Eng Verbesserung ass och virgesinn - esou steet et am Exposé des motifs - fir Fraen, déi an der Recherche schaffen, wa se e Puppelchen erwaarden. Bis elo huet eng Frau, déi e Kand erwaart huet, keng extra Mesurë kritt. D'Bourse ass stornéiert ginn. Dat huet hirer Rechercheaarbecht vläicht gedéngt, mä déi Fra huet awer risquéiert an hirem Congé de maternité kee Revenu ze hunn. Elo ass virgesinn, dass d'Bourse ëm den Zäitraum vum Congé de maternité verlängert gëtt; dat begrësse mer natierlech.

Dobäi ass jo och kloer an däitlech de Wëllen ausgedréckt ginn, dass d'Bourse „formation-recherche et développement“ d'Ausnahm soll bleiwen. Beim Contrat à formation-recherche et développement si jo déi positiv Rechter wéi Congé parental, mi-temps fir d'Kanner ze versuergen, d'office ga-

rantéiert. An awer wäert et an der Praxis schwéier sinn, sech länger Zäit aus engem Rechercheprojet zrëckzeziehen; gutt Crèche a Structures d'accueil sinn och fir d'Uni extra wichtig.

Do waren dach emol lwwerleeunge fir eng Crèche op der Uni opzemaachen. Ass déi Iddi nach aktuell, gëtt se realiséiert oder ass se gestuerwen?

Besser Aarbechtskonditiounen an der Recherche heescht ee bessere Verdéngscht, besonnesch bei de Berufsuufänger. Aus der Tabelle vum Exposé des motifs, souwäit wéi een do iwwerhaapt ka vergläichen, schéngt ervirzegoen, dass eis nei Hëllef fir d'Formation fir den Doktorat déi héchste sinn. Dat ass korrekt. Mir hu jo och aner Hëllef an op héijem Niveau.

Bei postdoktorale Formationen leie mer net gradesou wäit un der Spëtzt, mä och hei sinn d'Vergläicher mat vill Virsiicht ze zéien; ënnerschiddlech steierlech a sozial Konditiounen maachen de Vergleich einfach schwéier.

Besser Aarbechtskonditiounen heescht awer och gutt Infrastrukture schafen. A well d'Realisatioun vun den exzellenten Infrastrukturen, wéi mer se dann op Esch/Belval eng Kéier wäert kréien, nun emol Zäit brauch, stellt sech besonnesch elo fir vill Sparten d'Fro vun den lwwergangsregelungen vun de Raimlechkeeten, déi mer brauchen, fir d'Expansioun vun der Recherche net ze bremsen, bis Esch/Belval zur Dispositioun steet. Eng ganz positiv Léisung ass do zum Beispill um Campus zu Walfer fir d'Faculté des lettres, des sciences humaines, des arts et des sciences d'éducation fonnt ginn. Aner Unitéite wéi zum Beispill d'Unités de recherches physiques et matériaux waarden nach op eng lwwergangsléisung.

Besser Aarbechtskonditiounen heescht awer och - net nëmmen zu Lëtzebuerg, mä besonnesch hei zu Lëtzebuerg - kloer Aarbechtsverhältnisse mat engem transparenten Aarbechtskontrakt schafen.

Mir begrëissen, ech hunn et scho gesot, dass d'Subventioun vun der Formation-recherche, déi dozou déngt, en Aarbechtskontrakt Formation-recherche mat engem Chercheur ze finanzéieren, d'Regel soll ginn. D'Bourse „formation-recherche et développement“, déi direkt un de Chercheur geet, soll d'Ausnahm bleiwen. Bis heihinner si mir mam neie Gesetz d'accord. Dat läit alles am grénge Beräich. Dat ass alles positiv.

**(Interruptions)**

Et bleift nach eng allgemeng Remarque zur Problematik.

D'Zuel vun de Chercheuren zu Lëtzebuerg kann eropgoen, andeems mir besser Konditiounen schafen, esou wéi meng Virriedner an ech selwer et elo grad beschriwwen hunn. D'Zuel vun de Chercheuren, déi aus de Lëtzebuerger Schoule kommen, geet awer och nëmmen erop, wa méi Schüler zu Lëtzebuerg aus eisem Enseignement secondaire erauskommen, déi eng Berechtigung hu fir en Héichschoulstudium unzefänken. Dat huet awer bäi Wäitem manner mat Bourssen a finanziellen Hëllef an ze dinn, dat huet villméi mat schoulesche Programmer, Evaluatioun an Ëmgang mat eiser Sprochevillfalt ze dinn.

De Projet de loi 5733 huet eng ganz Rei positiv Mesurë festgehalen an DÉI GRÉNG si selbstverständlech och drun interesséiert a gäre bereet matzeschaffen, dass d'Formationen zu Lëtzebuerg sech weider positiv entwéckelt.

Leider maachen awer zwee Punkten, déi d'Aarbechtsrecht betreffen, eis et schwéier, fir eisen Accord zu dësem Projet de loi ze ginn.

Den éischte Punkt: Souwuel d'Chambre de Travail wéi och d'Chambre des Employés privés wiere sech - an eisen Aen zu Recht - géint d'Banaliséierung vum Contrat à durée déterminée. Och mir sinn der Meinung, dass ee CDD just dann däerf gemaach ginn, wann et ëm eng prezis definéiert Aarbecht mat enger prezis definéierter Dauer geet.

Datt dat bei der Recherche oft de Fall ass, schéngt eis logesch ze sinn. Wa mir awer elo d'Méiglechkeet ginn, dës CDD bis op 60 Méint ze verlängeren, da schafe mir an



der Uni, an de Centres de recherche ee flott Mëttel eng flexibel Gestioum vum Personal ze maachen, deene jonke Chercheuren awer schafe mer och no jorelaanger Aarbecht keng berufflech sécher Situatioun, an dat mécht d'Carrière vum Chercheur, besonnesch fir Lëtzebuurger Studente mat Unis-Diplom, net interessant.

Dës Regelung erënnert och un déi vun de Chargés de cours an de Primärschoulen an an de Lycéeën, wou mat ähnlechen Argumenter vu flexibeler Personalgestioun ähnlech Ausnahme gegollt hunn, bis se vun der Cour administrative verworf gi sinn. Mir mengen, hei gëtt datselwecht am Héichschoulwiese probéiert, dat sech schonns an der Primärschoul an am Lycée als net tragbar erweisen huet.

En zweete Punkt, wou mer net d'accord sinn, dat ass mat der Regelung, datt ee Student nëmmen zéng Stonnen an der Woch schaffen däerf. D'Studente sollen net musse schaffen, fir hir eege Studien ze finanzéieren. Duerfir hu mer jo och zu Lëtzebuerg eng ganz Rei effikass Hëllefën; net all Student erfëllt awer d'Konditiounen fir dës Hëllefën ze kréien. Duerfir si mer der Meenung, datt zumindest Unis-Studenten a -Studentinnen zu Lëtzebuerg esou vill kënne schaffen, wéi se dat wëllen a wéi dat normaalt Aarbechtsrecht et zouléisst. Och wann de Statsrot festgestallt huet, datt mat dem aktuellen Text d'Méiglechkeet opbleift, fir e puer esou Kontrakter vun zéng Stonnen d'Woch ze ënnerschreiwen, dann ass dat jo éischters net gewollt, an zweetens kann dat och net d'Zil dovu sinn.

Virdrun hat ech eng aner Positioun wéi d'Riednerin vun der Demokratescher Partei, awer hei komme mer eis e bëssen entgéint. Mir wieren der Meenung, datt mer et bei de Studentinnen a Studenten ëmmerhin mat erwuessene Mënschen ze dinn hunn, déi och nach eng gewësse Bildung hunn, an déi och fir sech misste verantwortlech kënne soen, wéi vill Aarbecht si niewent hirem Studium mengen ze verdroen.

Et géif mech och interesséieren ze héieren, wéi grouss de Problem wierklech ass. Ech kennen och déi Recommandatiounen, déi den Här Biltgen och der Madame Brasseur gesot huet, datt alles, wat iwwer 15 Stonnen d'Woch geet, sech erweist, wéi wann dann d'Studië géife leiden. Et wier awer interessant ze wëssen, wéi vill Studenten hiert Studium vernoléisseg, well se ze vill niewelaanscht schaffe ginn. An da misst ee sech jo och nach froen, ob déiselwecht Studente besser studéiere géifen, wa se net géife schaffe goen.

Wier et net méi sënnavoll, esou Situatiounen a perséinleche Gespréicher zum Beispill am Tutorat ze regelen, wéi mat gesetzleche Restriktiounen?

Wa mer da schonn eng Limite virschreiwen, da geséiche mir déi Limite op alle Fall éischter bei 20 Stonnen an der Woch, wéi dat a ganz villen Nopeschlänner de Fall ass, wéi bei zéng oder 15 Stonnen.

Ech soen lech Merci fir d'Nolauschteren. Déi gréng Fraktioun wäert sech bei dësem Vote enthalen.

» M. le Président. - Ech soen dem Här Adam Merci. Als leschte Riedner ass den Här Gibéryen agedroen. Här Gibéryen, Dir hutt d'Wuert. Den Här Jaerling dréit sech och nach an.

» M. Gast Gibéryen (ADR). - Merci, Här President. Ech wëll och vun eiser Säit aus fir d'éischt dem Kolleg Lucien Thiel als Rapporteur e Merci soe fir säi gudde schrëftlechen a mëndleche Rapport. Ech wëll och an deem Merci d'Leit hei aus der Verwaltung respektiv aus dem Ministère mat aschléissen, déi eis jo awer mat enger ganzer Rei vun nätzlechen Informatiounen an dëser Aarbecht gedéngt hunn.

Fir d'ADR ass dat heiten e gutt, e wichteg Gesetz, wat fir d'Zukunft vun eisem Land wichteg ass. Lëtzebuerg war ëmmer als eent vun deene räichste Länner vun der Welt bekannt, mir waren awer leider praktesch mat um Schluss oder am leschten Deel, wat d'Fuerschung ubelaangt. Et huet also e groussen Nohuelbedarf hei zu Lëtzebuerg bestanen. De Kolleg Fayot huet schonn e gewëssenen Historique doriwwer gemaach, wat alles an deene

leschten zéng, 20 Joer hei geschitt ass. Ech géif soen, datt déi wichtegst Etapp d'Schafung vun der Uni Lëtzebuerg am Joer 2003 war.

De Kolleg Lucien Thiel huet an der Kommissioun eng Remarque gemaach, déi ech mer enregistréiert hunn. Hien huet gesot, d'Zukunft wäert eis weisen, dass d'Uni Lëtzebuerg déi wichtegst Décisioun an Investitioun fir d'Zukunft vum Land war, an net déi Investitiounen, vun deene mer oft mengen, datt et déi wichtegst sinn.

Hien huet déi Ausso net a sengem Rapport zréckbehalen, mä ech hunn awer wichteg fonnt, datt déi Ausso an der Kommissioun gemaach ginn ass, well si ass menger Meenung no fundamental richtig.

Wa mer bis elo Bourssen a Prêten un eis jonk Leit - meeschtens sinn et jonk Leit - ginn hunn, esou féiere mer haut eppes Neies an, nämlech Gehälter a Rémunératiounen, en Aarbechtsvertrag, dee mat hinne gemaach ka ginn. Mir ginn hinnen domadder eng gewësse Sécherheet, wat hiert Akommes iwwert déi Zäit ubelaangt, awer och eng gewësse Sécherheet, wat hir Sozialofsécherungen ubelaangt.

Et ass eng wichteg Viraussetzung fir déi Leit, déi an déi Formatioun ginn, datt se och Garantië kréien an datt se net vis-à-vis vun deenen, déi no engem Unisofschloss ophalen, am Fong benodeelegt ginn. Sécherlech si se fir eng Zäitche finanziell benodeelegt, mä et soll een dat awer esou wäit wéi méiglech iwwert dëse Wee opfänken.

(M. Lucien Weiler reprend la Présidence)

Mat deene Montanten, déi an dësem Gesetz stinn, kënnt Lëtzebuerg elo un d'Spëtz. Ech mengen, mir kommen do nëmmen deem no, wat ee vun engem Land wéi Lëtzebuerg ka verlaangen.

De Fonds national de la recherche gëtt beoptraagt, fir déi ganz Gestioum ze maachen. Duerfir muss een och kucken, datt de Fong genuch Leit kritt, fir ebe kënnen eng Struktur opzebauen, fir no baussen och ze weisen, wéi de Fong fonctionnéiert a wéi en zougänglech ass, mat der néideger Transparenz, fir eng besser Visibilitéit ze ginn, fir awer och eng rational Gestioum kënne ze maachen an - wat och am Rapport steet - eng Evolution am internationale Verglach, och e Suivi iwwert d'berufflech Carrière vun deene Leit, déi vun dësen Hëllef profitéieren, wéi herno hir Carrière sech weiderentwéckelt, a wat fir eng Répercussiounen dat hoffentlech am positive Sënn op eis national Economie huet.

Ech wëllt, nodeem praktesch alles gesot ginn ass, vläicht op ee Punkt agoen, dat ass nämlech d'Carrière vun deene Leit. Wa mer haut hei versichen, se finanziell besser ze ënnerstëtzen, a mat Recht, fir déi Zäit, wou se déi Aarbecht maachen, da muss een awer och kucken, datt déi Leit duerno hir Carrière kënne an enger menger Meenung no verbesserter Situatioun maachen. Do denken ech net nëmmen un de Privat-secteur, mä ech denken och un den öffentleche Secteur, wou déi Carrière am Prinzip beim Stat menger Meenung no, eiser Meenung no, net genuch honoréiert gëtt. Obscho mer och beim Stat awer wäerten an Zukunft méi Leit aus där doter Branche brauchen.

Duerfir, wa mer an deene leschten Deeg vill iwwer eng Gehälterreform schwätzen, sinn ech der Meenung, datt, wann een eng Kéier do konkret gëtt, een och dësen Aspekt net däerf verléieren.

Een anere Volet wollt ech nach zum Schluss belichten, awer ganz kuerz. Dat ass deen, deen den Aarbechtsministère hei ugeet. Et ass elo vu verschiddene Säite belicht ginn. Mir hunn als ADR och déi Motioun mat ënnerstëtzt, déi mer an der Kommissioun diskutéiert hunn.

D'Explikatiounen vum Minister ware kloer. Mir wëssen, datt mer zu dësem Zäitpunkt net aneschters kënne jugéieren oder handele wéi dat, wat mer elo an dësem Gesetz maachen. D'Regierung, de Minister huet eis d'Zouso ginn, soubal déi Direktiv ëmgesat wier, déi nach an Ausaarbecht wier, géif dat heiten deementspriedend korrigéiert ginn.

Mir hunn déi Offerte vun der Regierung kritt. Mir hu se an enger Motioun festgehalten a wäerten déi Motioun och matstëmmen, genauso gutt wéi mer och vun eiser Säit aus wäerten dësem gudde Projet zoustëmmen.

Ech soen lech Merci.

» Plusieurs voix. - Très bien!

» M. le Président. - Merci, Här Gibéryen. Dann huet den Här Jaerling d'Wuert nach gefrot.

» M. Aly Jaerling (Indépendant). - Merci, Här President. Ech kann och nëmmen dëse wichtege Projet begrëissen. Ech hu just e bëssen e Problem mat der Diskussioun, déi hei gefouert gëtt iwwert déi Zäit, déi d'Studenten dierfe schaffen oder net. Ech sinn einfach der Meenung, entweder studéiert een oder et schafft een.

Ech mengen, et muss eng Limite sinn an déi néideg Zäit muss bleiwen, fir dass d'Studië kënne anstänneg duerchgezu ginn. Wa mer d'Ouverture maachen, fir méi kënne ze schaffen, da riskéiere mer just, dass Leit aus net communautairë Länner kommen an dann ebe sech iwwert dee Wee op eisen Aarbechtsmarché wëllen erandrängen. Ech géif mengen, dat ass net déi richtig Approche. Déi richtig Approche ass, dass een en Délai setzt, wou een dierf schaffen.

En anere wichtege Punkt vun dësem Gesetz ass awer och, dass de Statut vun de Studenten elo bis 27 Joer geet. Dat ass och besonnesch wichteg fir déi net communautaire Leit, well wa se iwwer 25 Joer hunn an d'Studië méi wäit ginn, da musse se e Contrat de travail an eng Autorisation de séjour kréien. Dat Gesetz hei erlaabt deene Leit elo, fir hei am Land ze studéieren a fir net brauchen déi ganz Prozeduren, déi mer jo kennen, iwwer e Contrat de travail an iwwert d'Autorisation de séjour ze duerchlafen. Vill Patronë sinn einfach net bereet, e Contrat de travail ze maachen an deem Sënn, well se och e bësse fäerten, dass d'Studente sech iwwert dee Wee hei an d'Land era wëlle mogelen.

Dat ass och e wichtege Aspekt vun dësem Gesetz, dass de Student eben elo säi Statut huet bis 27 Joer. Dat ass och eng Upassung un eist Steiergesetz, well no deem hu jo hei am Land d'Elteren d'Méiglechkeet, d'Studente bis 27 Joer kënne op hirer Steuerkaart ze behalen. Dat ass am Fong eng Equitéit, déi hei geschafe gëtt, déi awer menger Usicht no wichteg ass.

Och dat ass e wichtege Aspekt vun dësem Gesetz. Duerfir géif ech mengen, dass een dat Gesetz hei nëmmen begrëissen an och stëmme kann.

» M. le Président. - Merci, Här Jaerling. Dann huet den zoustännege Minister, den Här François Biltgen, d'Wuert.

» M. François Biltgen, Ministre de la Culture, de l'Enseignement supérieur et de la Recherche. - Här President, Dir Dammen an Dir Hären, ech si ganz frou, dass mer haut dëse Projet kënne stëmmen, well et een Element ass am Mosaik vun där neier Fuerschungslandschaft, wéi mer se an dësem Land wëllen duerchbréngen. Et ass eng Fuerschungslandschaft, déi mer opbauen opgrond vun engem Avis vun der OCDE vum Joer 2006. Mir hunn am Mee 2005, elo si mer zwee Joer drop, d'OCDE gefrot - a mir waren dat éischt Land, dat d'OCDE gefrot huet -, eis en Avis ze ginn iwwert d'Fuerschungslandschaft zu Lëtzebuerg.

Wann ech dat nach eng Kéier kuerz ka résuméieren, wat d'OCDE gesot huet, dann huet se Folgendes gesot: Dir sidd e Land, wat wëllt méi Suen an d'Fuerschung investéieren; dat ass gutt esou. Dir hutt och eng ganz Partie vun Embryoe vu gudder Fuerschung; och dat ass gutt esou. Mä u sech ass d'Fuerschung - dat huet d'OCDE net gesot, esou hunn ech et awer verstanen - gewuess wéi Champignonen op der Wiss. Déi eng Champignonë sinn hei komm, déi aner sinn do komm, déi eng si méi grouss ginn, déi aner méi kleng bliwwen, an Dir hutt se all genätzt. Wann Dir wëllt besser ginn, da geet et net méi duer, dass d'Champignonë vun ënne wuessen, mä da musst Dir selwer, als Regierung, e bësse kucken, wat fir eng Champignonen Der wou wëllt fërderen.

Dat heescht, d'OCDE huet ganz kloer gesot: Dir musst méi politesch Responsabilitéit huelen, fir d'Fuerschung ze leeden. D'OCDE huet eis och gesot, dass u sech d'Fuerschungspolitik vun den Instituter, vun den Agencë gemaach gëtt, an net vun der Regierung. A si huet gesot: Dir musst als Regierung méi Initiativen huelen, an d'Agencë mussen dat exekutéieren. Ech wëll dat just soen, opgrond vun deem, wat d'Madame Brasseur gesot huet, déi elo net méi ka bei eis sinn. Dat ass awer net schlëmm, si kann dat jo noliesen.

D'Madame Brasseur huet d'Fro gestallt, déi richtig gestallt ass, ob dann elo den FNR de Conseil supérieur de la recherche ass? Neen, ebe just net. Den 29. Juli wäerten de Jeannot Krecké an ech deene éischte Conseil supérieur de la recherche arufen a mir wäerten deen och virstellen. Dat sinn néng Leit, déi mer geholl hunn, déi net mat iergendengem Lëtzebuurger Institut oder engem Lëtzeburger Betrib eppes ze dinn hunn, deen an der Recherche ass. Déi néng

Leit, dräi Leit aus der Wëssenschaft, dräi Leit aus der Wirtschaft, dräi Leit aus der Zivilgesellschaft, sollen eben d'Regierung beroden, wou d'Politik soll higoen.

Dat ass e wesentleche Punkt, dass et d'Regierung ass, haaptsächlech déi zwee Ministère Wirtschaft a Fuerschung, also den Här Krecké, d'Madame Modert an ech, déi Virgabe ginn. An deem Sënn ass och de Projet vu Biotec ze kucken, dee mer zu dräi Ministere lancéiert hunn. Do war de Gesondheitsminister och derbäi, well et ëm säi Secteur geet. Et geet drëm, dass mer méi politesch Akzenter setzen an da soen, wien déi exekutéiere soll. Exekutéiere sollen dann d'Agencen, de Fonds national de la recherche an d'Luxinnovation.

Bis elo hu mir am Ministère gesot: Wie kritt eng Bourse, wie kritt keng? Dat ass keng politesch Décisioun, dat ass eng technesch Décisioun opgrond vun de Gesetzer. An duerfir si mer der Meenung, dass den FNR, deen e ganzen Apparat huet, vill besser outilléiert ass, fir déi Décisiounen ze huelen, wéi mir am Ministère. Mir mussen eis Kraaft am Ministère drop setzen, fir ze soen, wat mer gären hätten. Den FNR ass e formidable Instrument, fir déi Politik ze exekutéieren, an duerfir ass eben déi heite Kompetenz fir den FNR eng zousätzlech Kompetenz, mä et ass keng politesch Kompetenz, et ass eng technesch Kompetenz. An ech mengen et ass och richtig, dass déi Leit dat maachen, déi dat kënne maachen.

Mir hunn och mam FNR e Contrat de performance ënnerschriwwen, deen deemnächst virgestallt gëtt. E Contrat de performance mat Luxinnovation gëtt dëse Freideg an der Regierung gekuckt. Wann d'Regierung d'accord ass, hu mer och mat Luxinnovation e Contrat de performance. Mir hu mat alle Fuerschungszentren e Contrat de performance ënnerschriwwen, esou dass mer elo bal alles ëmgesat hunn, wat d'OCDE eis gesot huet.

E Wuert zum Contrat de performance. Ech nennen déi ëmmer Contrats de confiance, well mir maache mëttelfristeg, dräi Joer elo, e Kontrakt, wou d'Fuerschungszentre wëssen, wat se vu Sue vum Stat kréien, wou se awer gesot kréien: Dir kritt ëmmer méi Sue vum Stat, mä Dir musst awer och ëmmer méi Sue bei anerer siche goen, souwuel bei Europa, bei den FNR respektiv bei Privatbetriber oder bei Verwaltungen. A wat mer och agesat hunn, dat ass den „full cost“-Prinzip. Et soll net esou sinn, dass mir d'Fuerschungszentre subventionéieren, an da geet ee bei se, well se bëlleg sinn, neen, et muss ee bei se goe well se gutt sinn. An ech mengen, dass all eis Fuerschungszentre bewisen hunn, dass se gutt sinn. Et gëtt elo ganz vill Beispiller „d'excellence“, déi mer hunn, a mir mussen op deem Wee weider-schaffen.

Dat elo emol virausgeschéckt wat eis Politik ass, ier ech dann op d'Detailer komme vun dësem Gesetz, wou ech awer dem Lucien Thiel als Rapporteur emol fir d'éischt wëll Merci soen, dass hien dat ganz verständlech gemaach huet. Hien huet pedagogesch Fäegkeeten, déi anerer net esou hunn, an hien huet dat ganz gutt gemaach, fir jiddferengem kloerzemaachen ëm wat et geet.

Duerfir maachen ech elo och net nach eng Kéier de Résumé vun deem, wat de Lucien Thiel lech gesot huet. Ech gi just op e puer Froen an.

Wëlle mer méi Chercheuren? Jo. Mir wëllen effektiv op zéng Chercheuren op 1.000 goen am Joer 2010. Mir wëllen och op 3% Fuerschung goen, hisiichtlech 2010. Dat ass just zu Lëtzebuerg ganz schwierig ze realiséieren. Woufir ass dat schwierig zu Lëtzebuerg ze realiséieren? Ma well eise PIB ze séier wiisst. Ech si kee Frënd vun deene Moossnamen, déi eppes mat dem PIB ze dinn hunn, well eise PIB méi séier wiisst wéi eis Efforté vun der Recherche wuessen.

Mir hunn awer, vun 2000 bis 2005, eis Recherche vervéierfacht, d'Recherche publique. Bis 2010 gëtt se nach eng Kéier verduebelt, dat heescht par rapport zu 2000 ass se da veraachtacht. Mä wa mer kucken, wat dat par rapport zum PIB ausmécht, ass dat vill manner. An dat ass e bësselchen e Problem, dee mer zu Lëtzebuerg hunn. Mir gi ganz vill Suen an d'Fuerschung, mä international kréie mer gesot: Et ass net genuch par rapport zum PIB. Also, wa mer elo eng Kéier eng richtig gutt Kris hätten a mir géifen de Budget bäibehalen, da géifen op eemol all déi auslännesch Observateurs soen: Wat maacht Dir grouss Recherche-Efforten!, well et sinn esou vill Prozent vum PIB.

Ech weess, dass jiddfereen no deene PIB-Prozenter kuckt, mä ech kucke léiwer no deene Suen, déi mer an d'Recherche



stiechen, absolut, wéi no PIB-Prozenter. Émsou méi, dass ee jo muss wëssen, dass et an der Recherche net nëmmen drëm geet, Suen auszeginn, mä et geet och drëm, fir herno Outputen ze hunn. Fir ze soen: Mir hunn esou vill dragepompelt, dat ass schéin a gutt, mä herno mussen mer och eng Kéier Rechenschaft doriwwer ofleeën - well dat si Steiersuen -: Wat hutt Der dann domadder erreecht? Wat sinn d'Outputen? Duerfir sinn an deene Contrats de performance och ëmmer Kritären, wéi mer moossen, wat herno dobäi erauskënnt.

Dat ass also e wichtege Punkt, d'Outputen ze hunn. Et huet kee Wäert, ëmmer méi Suen an d'Recherche ze pompelen, wa mer net wëssen, wat dobäi erauskënnt. Et geet an der Recherche net nëmmen drëm, eppes ze sichen, et geet och drëm, eppes ze fannen. Et fënnt een net ëmmer eppes, wann een eppes sicht, mä do wou ech e Problem hunn, dat ass, wa mer elo einfach Sue géifen an eppes stiechen a wou mer eppes géife sichen, wat anerer scho fonnt hunn. Mir solle scho Risiken agoen an der Recherche - dat maache mer zum Beispill bei deem Biotechprojet -, mä mir mussen eis awer Parametere ginn, fir sécher ze sinn, dass herno och Output dobäi erauskënnt. Och déi Diskussiounen si mer amgang ze féieren.

Mir brauche méi Chercheuren. Recherche huet eppes mat Laboratoiren ze dinne, et huet awer virun allem eppes mat Mënschen ze dinne. A wa mer méi éischt Klass Chercheure brauchen, da brauche mer och, à la base, méi jonk Chercheuren. Well wann een net genuch jonk Chercheuren huet, dann huet een och keng, déi duerno gutt sinn.

Et gëtt ëmmer gesot, mir mussen kucken, dass d'Chercheuren och en uerdentleche Verdéngscht hunn. E Chercheur, dee sech duerchgesat huet, deen huet e ganz gudde Verdéngscht, well dee gëtt vun all Säit ëmworben. Mä et sinn déi jonk Chercheuren, déi de Problem sinn. Déi jonk Chercheuren, dat sinn oft jonk Leit tëschent 25 a 35 Joer. Wann déi net genuch ënnerstëtzt ginn, da soen déi: Ech maachen eppes anescht, am Liewen, amplaz hei an enger prekärer Situatioun ze sinn.

Den Haaptpunkt vun dësem Gesetz ass, fir ze kucken, dass déi jonk Chercheuren - et sinn nach e puer Nieweprodukter an dësem Gesetz dran -, mä d'Haaptprodukt ass: Wéi gi mer deene jonke Chercheuren eng besser Ofsécherung? Engersäits andeem se méi Sue kréien. Elo leie se wierklech esou just um Mindestloun, wa mer kucken, wat mer vu Bourse hunn. Ech mengen do muss een driwwergoen, a mir hunn och am Budget virgesinn, dass mer vu 6,3 - bis 2010 - op 17,3 Milliounen Euro an eis jonk Chercheure stiechen. Ech soen dat hei just, fir dass ee gesäit, dass dat och e finanziellen Effort ass. Mir brauchen der méi, also mir rechnen mat méi Chercheuren, an all Chercheur kritt och méi staatlech Ënnerstëtzung. Dat ass dat Éischt.

Dat Zweet ass, dass se haut wéi e Student betruecht ginn an eng Bourse kréien, mat all deene Problemer, déi och hei gesot goufen, notament wat jonk Frae betrëfft, wa se e Kand wëlle kréien. Da fale se an all soziaalt Lach a sinn da wierklech total - dat soen ech elo hei, an ech stinn och dozou - am Subproletariat. Duerfir hätt mer gär, dass Aarbechtskontrakter kommen.

Elo kommen ech op dee Punkt, dee jo vun deem engen oder aneren hei contestéiert gouf a wou gesot gouf: Dat ass schlecht, dass Dir hei fënnel Joer maacht fir déi jonk Chercheuren. Woufir maache mer fir déi jonk Chercheure fënnel Joer? Ma well se bis elo iwwerhaapt kee Kontrakt haten. Mir ginn dovunner aus, dass een „Doc“, „Postdoc“ an der Regel zwee bis fënnel Joer dauert. Dräi ass e bësselchen d'Fauschtregel, mä dat ka méi laang goen.

Wat d'Aarbechtsrecht ubelaangt, maache mer keng grouss Entorse. D'Aarbechtsrecht seet: zwee Joer maximal, an zweemol verlängert. Mir soen zweemol verlängert, mä bis zu fënnel Joer. Woufir? Well et oft net dran ass, an zwee Joer säin Doktorat ze maachen. Mir kënnen eis virstellen, dass ee bei villen ee Kontrakt géif maachen op ee Joer, fir emol ze kucken, ob se weiderkommen. Et sinn och jonk Doktoranden, déi nom éischte Joer ofbriechen, well se net weiderkommen.

Dat wier fir dat éischt Joer, also dass deen éischte Kontrakt op ee Joer wär, an dann zwee Joer Verlängerung, fir säin Doktorat fäerdeg ze maachen. Dat wier also dat Besch - eent plus zwee Joer, an da wier ee fäerdeg -, mä et gëtt een net ëmmer an eent plus zwee fäerdeg. Duerfir déi zweet Verlängerung nach bis maximal zwee Joer fir déi kënnen ze maachen. Do ass de Parteien elo alles op. Mä ech mengen, dass et wichteg ass, dass mer dat doten ubidden; méi jonk Chercheuren. Duerno ass eng aner Welt. Duerno muss ee kucken entweder opzehalen oder e feste Kontrakt bis iergendwou aneschtens ze kréien.

Do wëll ech och e Wuert soen. Wat hei e bësse monéiert gouf, dat ass, dass mer soen: Fënnel Joer ass net nëmme fir déi jonk Chercheuren; a bei deene jonke Chercheuren ass et egal, ob se am privaten oder öffentleche Secteur sinn. An da soe mer: E Chercheur beim öffentleche Secteur huet och fënnel Joer.

Beim private Secteur hu mer dat net virgesinn. Mä de privaten huet eng aner Dispositioun am Aarbechtsrecht. Déi hunn ech schonn oft ugewannt, well do geet et ëm Projeten. Ech hunn och schonn am private CDDen accordéiert, déi iwwer fënnel Joer gaange sinn, wann et e Projet war fir iwwer fënnel Joer. Dat huet bei verschiddene Betriber zu Lëtzebuerg vill Invest op Lëtzebuerg bruecht an huet de Siège zu Lëtzebuerg séchergestallt bei deenen Öffentlechts-Rechtlechen.

Bei der Uni a bei den CRPe soe mer: Dir kënnt effektiv eng éischte Kéier een huele fir fënnel Joer, fir en ze testen. Mä duerno, entweder ass e gutt oder en ass net gutt. Wann en net gutt ass, dann ass en net gutt, mä wann e gutt ass, dann däreft Der net duerno nach eng Kéier verlängeren a verlängeren a verlängeren, mä da musst Der him och en CDI ginn.

Mir wäerten am Hierscht och eng Diskussioun féiere mat eise Fuerschungszentren, fir hinnen ze soen, dass et scho wichteg ass, dass een och eng Partie Leit am CDI huet an dass et, och wann een e Projet huet, dee ka verlängert ginn, vläicht heiansdo besser ass, et mécht een en CDI. A wann de Projet net verlängert gëtt, da kënnegt ee weinst Motif économique, wat geet, amplaz dauernd CDDen ze verlängeren.

Also, mir hu schonn eng Politik, an déi wëlle mer mat öffentlechen Häiser och duerchdiskutéieren. Bei der Uni steet am Gesetz: fënnel Joer an duerno näischt méi. A mat den CRPe maache mer dat och. Mir hätt scho gär, dass eng Politik kënnt vu prinzipiell CDlen, an nëmme subsidiaresch CDDen; mä et geet net aneschtens an der Fuerschung wéi mat CDDen. Wa mer nëmme Leit mat CDI astellen, dann ass eemol d'Haus selwer esou scléroséiert, dass et net méi kann nei Entwécklung matmaachen.

Richtig ass och, dass mer mussen zu Lëtzebuerg kucken, mat de Centres de recherche a mat der Uni, fir bei eise jonke Leit méi Reklamm ze maache wat mir haut vu Fuerschung hunn. Ech hunn all Dag jonk Fuerscher - Lëtzeburger -, déi kommen a se soen: Hues de keng Plaz fir mech? De Problem ass, dass Recherche eppes ganz Vastes ass an dass mir nëmme kënnen weineg Saache maachen.

Et ass also wichteg, dass d'Leit mat Zäite wëssen: Wat sinn eis Achsen? Wou gi mer hin? A wa se wëllen op Lëtzebuerg eng Kéier zrëckkommen, dass se och wëssen, dass se sech éischter an déi eng oder déi aner Richtung orientéieren. Dat mussen mer elo opbauen, fir dass eis Leit méi informéiert sinn. Bis elo konnt dat net goen.

Da kommen ech op den zweetleschte Punkt, op deem ech wollt agoen. Dat ass dee vun der Studentenaarbecht. Ech bleiwen derbäi, dass et dat Wichtigst fir e Student ass, dass hie studéiert a seng Diplomer kritt, an net dat Wichtigst ass, dass hie schaffe geet. Ech kann dofir net mat der grénger Proposition d'accord sinn, an och wat d'Madame Brasseur gesot huet, fir ze soen: Et si jo erwuesse Leit, déi wëssen, wat se maachen.

Notament wat d'Netcommunautairen ubelaangt, muss ee wëssen: Wat ee méi zougesteet, wat se méi ënner engem Drock si vun de Betriber. A wa se da méi schaffe wéi studéieren, da packe se d'Joer net. An da komme mir dohinner a mir soen: Ah, du hues d'Joer net gepackt, also hues de keng Ursaach méi, fir zu Lëtzebuerg ze bleiwen, also gëss de erëm heemgeschéckt. Et muss een heiansdo d'Leit viru sech selwer schützen. Dat ass dat, wat mer hei wëlle maachen; dofir déi 15-Stonregel, déi awer international erweisen ass.

Wann Der elo dat liest, wat mer am Gesetz hunn, hu mer eng 15-Stonregel, déi just e bësse komesch formuléiert ass, andeem mer nämlech soen, während zwee Méint kann ee 40 Stonne schaffen ënner Studentenaarbecht, a während deenen anere Woche kann een zéng Stonne schaffen an engem normalen Aarbechtskontrakt.

Ech si mat der Commission de l'Immigration - ech war jo, Här Fayot, bei lech - an ech sinn och mat deenen zwou anere Kommissiounen - Travail a Kultur, Här Sunnen an Här Glesener - eens, fir ze soen: Et wär besser, mir hätten eng 15-Stonnewoch an déi kënnt iwwert d'Joer esou pendelen. Well wa mer e feste Kontrakt hunn op e Joer, huet de Student och méi Congé zegutt; hien huet méi Sécurité sociale zegutt.

Dat heescht, ech sinn d'accord, dass mer op e 15-Stonnekontrakt ginn. Déi Regel, déi mer elo hunn - zéng a 40 - bréngt mat sech, dass de Student 740 Stonne ka schaffen. Maache mer eng 15-Stonnewoch, da sinn et der 760. Esou dass d'15-Stonnewoch scho richtig ass, mä da mussen mer eng Joresreferenzperiod maachen; wat déi aktuell Aarbechtszäitdirektiv vun '93 eis net erméiglecht, wat awer déi nei eis kann erméiglechen. D'Sozialpartner kéinten dat maachen. Mä et geet net, well hei gëtt et kee Secteur vu Studenten. Hei fanne mer keen, deen et kéint verhandelen. Also muss de Gesetzgeber dat kënnen maachen. Dofir huelen ech déi Motioun gären un.

Et ass gefrot ginn: Geet d'Wuert lech net duer? Jo. D'Wuert geet scho jiddferengem duer, mä et ass awer gutt, wann d'Leit och gewuer ginn, dass et e Wuert vum Minister gëtt. Dofir ass et och gutt, wann eppes schréfflech festgehalte gëtt. Duerfir hunn ech kee Problem, déi Motioun selbstverständlech unzuhuelen.

Dann e leschte Punkt, dat ass dee vum Vakanzenjob. Et gëtt oft verwiesselt: Studentenaarbecht a Vakanzenjob.

Studentenaarbecht ass e Student, dee schafft. Dat erméigleche mer elo, andeem mer soen: Während fënnel Joer kann e Student, ob am Secondaire oder am Supérieur, zéng Stonne schaffen an engem CDD, ouni dass dann de Patron muss Émweeër fannen, wéi deen CDD nach rechtens ass oder net. Dat heescht, et gëtt och fir de Patron méi einfach, Studenten anzustellen. Dat ass ee vun de Punkten, dass mer dat maachen.

Dat ass Studentenaarbecht, déi normal rémunéréiert gëtt nom normalen Aarbechtsrecht, well ech der Meinung sinn, wann ee 25 Joer huet - also de Regelfall do, tëschent 22 an 28, en normalen Unisstudent -, dass een dann och soll scho kënnen seng Carrière an der sozialer Versécherung opbauen an net alt nëmme just Vakanzenjobe maachen.

Vakanzenjobe gesi mer awer och nach vir, a mir wëllen déi och förderen. Do maache mer zwou Saachen.

Dat eent ass, dass mer...

(Interruption)

Ech kommen zum Schluss.

...vu 25 op 27 Joer eropginn, well eben haut méi spéit d'Leit och nach studéieren. An et sinn der, déi wëllen net Studentenaarbecht maachen, mä just e Vakanzenjob maache mat 26, 27 Joer. Dat gëtt elo méiglech.

Dat Zweet dierft ville Gemengen entgéintkommen, déi oft an de Vakanze Studenten astellen; ech denke virun allem un Tourismusgemengen. Déi stellen oft Studenten an an der Vakanz, déi dann och misste sonndes schaffen; zum Beispill op eise Plagen an esou weider. Dat huet dat aktuell Vakanzenjobgesetz net erlaabt. Dat erlabe mer elo. Dat ass also eng gutt Saach fir de Student, dee sech kann an der Vakanz - selbstverständlech net während der normaler Schoulzäit - e puer Suen derbäiverdengen. A fir verschidde Gemengen ass dat dann och méi einfach an der Vakanz hir Tourismusaktivitéite flott ze leeden.

Voilà! Dat gesot, wär ech frou, wa mer kéinten hei wa méiglech eng Unanimitéit kréien. Ech soen lech Merci, dass mer dat heite Gesetz esou kënnen stëmmen, dass déi eng Dispositiounen fir d'Studenten direkt a Kraaft trieden, an déi aner iwwert d'Boursen den 1. Oktober.

» M. le Président.- Merci, Här Minister. Dir Dammen an Dir Hären, mir kommen dann zum Vote iwwert dëse Projet de loi.

Vote sur l'ensemble du projet de loi et dispense du second vote constitutionnel

De Projet de loi 5733 ass ugeholl mat 53 Joestëmme, bei 7 Abstentiounen.

Ont voté oui: Mmes Sylvie Andrich-Duval, Nancy Arendt, M. Lucien Clement, Mmes Christine Doerner, Marie-Josée Frank, Marie-Thérèse Gantenbein-Koullen, MM. Marcel Glesener, Norbert Hauptert, Mme Françoise Hetto-Gaasch, MM. Ali Kaes, Paul-Henri Meyers, Laurent Mosar, Marcel Oberweis, Gilles Roth, Patrick Santer, Marcel Sauber, Jean-Paul Schaaf, Marco Schank, Marc Spautz, Mme Martine Stein-Mergen, MM. Fred Sunnen, Lucien Thiel, Lucien Weiler et Michel Wolter;

MM. Marc Angel, Alex Bodry, John Castegnaro, Mme Claudia Dall'Agnol, M. Fernand Diederich (par M. Ben Fayot), Mme Lydie Err, MM. Ben Fayot, Jean-Pierre Klein, Mme Lydia Mutsch, MM. Roger Negri, Jos Scheuer, Romain Schneider, Roland Schreiner et Mme Vera Spautz;

MM. Eugène Berger, Xavier Bettel, Mme Anne Brasseur, M. Fernand Etgen, Mme Colette Flesch, MM. Charles Goerens, Paul Helminger, Alexandre Krieps (par M. Fernand Etgen), Claude Meisch et Carlo Wagner;

MM. Gast Gibéryen, Jacques-Yves Henckes, Jean-Pierre Koepf (par M. Jacques-Yves Henckes) et Robert Mehlen;

M. Aly Jaerling.



Chambre  
des Députés  
L U X E M B O U R G

Chamber TV

och an der Rediffusioun all Sëtzungsdag vun 19:00 Auer un



*Se sont abstenus: MM. Claude Adam, François Bausch, Félix Braz, Camille Gira, Jean Huss (par Mme Vivianne Loschetter), Henri Kox et Mme Viviane Loschetter.*

Gëtt d'Chamber d'Dispens vum zweete Vote constitutionnel?

**(Assentiment)**

Dann ass et esou décidéiert.

**Motion 1**

Mir sinn och konfrontéiert mat enger Motioun, déi den honorabelen Här Thiel déposéiert huet. Den Här Minister Biltgen huet deklaréiert, dass d'Regierung dës Motioun unhëlt. Kënne mer par main levée ofstëmmen?

**(Assentiment)**

**Vote**

Wien d'accord ass, ass gebieden d'Hand an d'Luucht ze hiewen.

Voilà! Ech gesinn, dass dat eng ganz grouss Majoritéit ass. Domat ass déi Motioun ugehall.

**6. Heure d'actualité demandée par le groupe DÉI GRÉNG sur l'arrêt rendu par la Cour de Justice des Communautés européennes dans l'affaire 319-06 concernant la transposition de la directive détachement des travailleurs (suite)**

**Résolution 1**

Mir kommen dann zum Vote iwwert d'Resolution, déi vun der ADR déposéiert gi war an der Debatt virdrun. Ass de Vote électro-nique verlaangt?

Här Jaerling? Mir hu keng Motioun méi. Eng Resolutioun. Här Jaerling, wann ech gelift.

**» M. Aly Jaerling (Indépendant).**- Här President, wann elo schonn de Minister e Blâme soll ausgesprach kréien, wann hien alles richteg gemaach huet, wat maache mer dann erëischt, wann hien eng Kéier eppes falsch gemaach huet?

**(Hilarité)**

**» M. le Président.**- Dir Dammen an Dir Hären, kënne mer par main levée ofstëmmen?

**(Assentiment)**

**Vote**

Wien ass d'accord mat där Resolutioun vun der ADR?

**(Interruption et hilarité)**

Dräi.

Wien ass dergéint?

Voilà! D'Resolutioun ass mat enger ganz grousser Majoritéit ofgelehnt.

**7. Ordre du jour (suite)**

Ech wollt der Chamber soen, dass opgrond vun der Modifikatioun, déi den honorabelen Här Gira haut de Mëtteg gefrot huet, den Här Innenminister Halsdorf sech bereet erkläert huet, fir en Donneschdeg de Mëtteg um hallwer dräi Stellung ze huelen zur Problematik, déi den Här Gira opgeworf huet. Ass d'Chamber domadder d'accord?

**(Assentiment)**

Dann ass et esou décidéiert.

Dir Dammen an Dir Hären, mir kommen zum zweetleschte Punkt vun eisem Ordre du jour vun haut. Dat ass de Projet de loi relatif à la liaison Micheville. D'Wuert huet elo d'Rapportrice vum Projet de loi, déi honorabel Madame Sylvie Andrich-Duval.

**8. 5845 - Projet de loi relatif à la construction de la liaison Micheville entre la route N 31 et le projet routier afférent sur territoire français**

**Rapport de la Commission des Travaux publics**

**» Mme Sylvie Andrich-Duval (CSV), rapportrice.**- Här President, Dir Dammen an Dir Hären, beim virleiende Gesetzesprojet handelt et sech ëm déi zweet Phas vun der sougenannter Liaison Micheville. Erlaabt mer duerfir e kuerze Rappel vun der Geschicht vun deene grouss Bauaarbechten op dem Site Belval.

Dës Aarbechte gi respektiv sinn op den Intanzewee gaangen als e legislative Pak, deen aus dräi Gesetzestexter besteet. Et geet drëms, eng Verbindungsstrooss um Site Belval hierzustellen, tëscht der Escher Autobunn a Frankräich, déi dann op franséischer Säit soll an de Contournement vun Däitsch-Oth eraféieren. Fir d'Aarbechten op der franséischer Säit ass de Conseil général de la Moselle zoustänneg. An hei ka sécherlech den Här Minister eis nach iwwert de leschte Stand op franséischer Säit Opschloss ginn.

Et ass ervirzesträichen, dass déi lëtzebuergesch Regierung an déi franséisch Autoritéite Konventiounen ënnerschriwwen hunn, fir d'Modalitéite vun hirer Zesummenaarbecht ze regelen. Ënner anere mëll ech drun erënneren, dass eng Ännerung vun der Grenz tëscht deenen zwee Länner virgeholl ginn ass, fir et ze erméiglechen, all Flächen, déi vu Lëtzebuurger Säit solle bebaut ginn, op lëtzebuergeschen Territoire eriwuerzeshuelen.

Et ass also en eminent wichtige Stroossebauprojet, deen et erlaabt, de Site Belval mat all sengen neie Projeten - dat si souwuel staatlech a kommunal Projete wéi och privater - viabel ze maachen. Ëmmer méi Gebaier schéissen hei aus dem Buedem, vun der Dexia BIL iwwert de Lycée Esch/Belval bis zur Uni Lëtzebuerg an der Plaza.

D'Entwécklung vun engem groussen Deel vun der Region Süden ass mat deem Projet verbonnen. Zousätzlech huet en eng Dimensioun Groussregioun an dréit zu enger Entlaaschtung vun deem dichte Grenzverkéier bái, gradesou wéi zur Entwécklung vun dem ugrenzende Raum op franséischer Säit. Dat erkläert och d'Drénglechheet vun deem virleiende Gesetzesprojet, dee gréng Luucht soll gi fir d'Stroossebauaarbechte virunzeféieren.

Am éischte Gesetz vum 3. August 2005 ass d'Regierung autoriséiert, fir all Virbereedungsaarbechte vun der Liaison Micheville virzehuelen, dat heescht en Tunnel vu 432 Meter, deen Zougank op de Square Mile gëtt, an dobäi nach verschidden ënnerierdesch a baussescht Infrastruktuur-arbechten.

An deem virleiende Gesetzesprojet, deen zweeten also, geet et drëms, déi schonn ugefaange Stroossenachs ze verlängeren, déi vum Rond-point am Süde vun den Eisebunnsgleiser bis d'Route nationale 31 soll goen.

En drëttes Gesetzesprojet soll den Ofschloss vun den Aarbechten duerstellen, déi eng Verbindung sollen hierstellen tëscht der Route nationale 31 bis den Échangeur vu Lankels duerch de Bau vum Nordcontournement vun der Cité Raemerech.

Wat deen historeschen Deel ugeet, verweisen ech fir weider Detailer op mäi schrëftleche Rapport, an deem nach eng Kéier de ganze Werdegang vun dem Stroossebauprojet duergestallt gëtt an deen et erlaabt, en lwwerbléck iwwert de gesamte Package vun den Aarbechten ze behalen.

De Projet de loi 5845 gouf de 27. Februar 2008 vum Bauteminister Claude Wiseler hei an der Chamber déposéiert. De Projet war motivéiert, war graphesch duergestallt an et louchen zwou Finanzfichë bái.

De Statsrot huet säin Avis den 20. Mee 2008 ofginn an et koom nach en zousätzlechen Avis den 1. Juli. An der Bautekommissioun vum 9. Juni 2008 ass de Projet de Membere virgestallt ginn an den éischten Avis vum Statsrot gouf analyséiert. An darselwechter Sitzung sinn ech als Rapportrice vum Gesetzesprojet bestëmmt ginn.

D'Membere vun der Bautekommissioun hunn des Weideren do décidéiert, fir den éischten Artikel vum Gesetzesprojet ze amendéieren. Den Amendement besteet doran, d'Enn vum Saz ewechzelosson, dat heescht déi explizit Referenz op de Crassier vun Éilereng fir ausgebagert Material ofze-

lageren, dat fir d'éischt entgëft géif ginn. Ech wäert nach spéider a mengen Ausféierungen heirop zrëckkommen.

Nodeems de Statsrot säin Avis complé-mantaire ofginn hat, huet d'Bautekommissioun an hirer Sëtzung vum 3. Juli hir Analys dovun gemaach. De schrëftleche Rapport gouf dann och an der Sëtzung vum 3. Juli eestëmmeg ugehall.

Wéinst der héijer Technicitéit vum virleiende Projet probéieren ech, déi bautechnesch Aspekter ze résuméieren a verweisen op mäi schrëftleche Rapport an den Text vum Gesetzesprojet fir déi detailléiert Beschrei-vung vun de geplangtenen Aarbechten.

Déi Aarbechten, déi duerch de virleiende Gesetzesprojet sollen autoriséiert ginn, si folgend: Wéi scho gesot geet et drëms, déi ugefaange Stroossenachs ze verlängeren, déi vum Rond-point am Süde vun den Eisebunnsgleiser bis d'Route nationale 31 soll goen.

D'Stroosseféierung soll nördlech laanscht de Site Belval verlafen an déi Stroossen-aménagementter südlech vum scho ge-bautenen Tunnel gi fäerdeg gestallt. Dat heescht, dass ënnert de Gleiser vun der Zuchstreck Esch-Péiteng an de Gleiser-uschlëss erduerchgefuer gëtt, gradesou wéi ënnert der Achs vun der Strooss CR168.

An dësem Deel ass och e Rond-point mat engem ënnerierdesche Passage a Richtung vun dem franséische Stroossennetz, notam-ment bis de Contournement vun Däitsch-Oth virgesinn. Et gëtt jiddefalls gekuckt, dass den Eisebunnstrafic ka virulafe während den Aarbechten.

Weiderhin ass e Réckhaltebecke virgesi fir d'Reewaasser ze sammeln. De Rond-point wäert ausserdeem den Uschloss un e Park&Ride-Parking erméiglechen, deen no bei der franséischer Grenz gebaut gëtt, fir de Grenzgängerverkéier opzefänken, deen och direkt verbonne gëtt mat der neier Gare vum Site Belval.

Am Tunnel vu Micheville selwer sollen dann déi verschidde Stroosse fäerdeg gestallt ginn, gradesou wéi d'technesch Lokaler an déi technesch Equipementer fir de ganzen Tunnel.

Am Norde gëtt dann de Réibau vum Tunnel vu Micheville laanscht den Helleg-Geescht-Plateau mat sengem Zougankstriichter fäerdeg gestallt. D'Nationalstrooss 31 gëtt ausgebaut a fir Bussen zougängeg gemaach an et gëtt eng provisoresch Verbindung vum Tunnel bis zur Route na-tionale 31 duerch e provisoresche Rond-point hiergestallt. Den Zougank a Richtung Esch geschitt dann iwwert déi bestehend Strooss, déi laanscht d'Arcelor-Weieren nei aménagéiert gëtt fir un de Rond-point Raemerech unzebannen.

De Käschtepunkt vum Bauprojet ass op 115.500.000 Euro beim Bauindex 646,07 vum Abrëll 2007 chiffriert. An dësem Chiffer sinn och d'Sanéierungsonkäschte mat abegraff. Déi néideg Fonge sinn am Fonds des routes virgesinn. Wat En-tretienskäschte vun de Lokaler ubelaangt, esou fanne mer déi Renseignementer op där zweeter Fiche financière, an zwar sinn dat pro Joer ëm déi 2.600.000 Euro.

Et ass och nach wichteg, Dir Dammen an Dir Hären, bei dësem Projet e Wuert ze verléieren iwwert de speziellen Aspekt vun der Sanéierung vum Site. De Problem vun der Décontaminatioun vum Site sollt seng Léisung eigentlech op der Décharge vum Helleg-Geescht-Plateau um Site Belval fannen, wou all d'Offäll sollte gelagert ginn.

Dëse Konzept gouf vun der Ëmweltver-waltung zesumme mat dem Ëmweltservice vun Arcelor an der Agora ausgeschafft. Duerch verschidden Ursache bedéngt, ass festgestallt ginn, dass dëst awer net méiglech wier. Dat sinn ënner anere d'Ännerung vum Verlaf vun der Liaison Micheville, déi provisoresch Lokaliséierung vum Centre Gabriel Lippmann an déi méi grouss wéi geduechte Mass vu Material, déi ze stockéieren ass.

Dofir ass d'Alternativ vum Crassier vun Éilereng derbäikomm, wou eng Synergie sollt tëscht der Décontaminatioun vum Site Belval entstoan an der Erstellung vun enger nationaler Industriezon, duerch d'Hand vum Wirtschaftsminister. Den Ëmweltministère gouf vun Ufank u mat abezunn an huet säin Accord de principe dozou ginn.

Den explizite Renvoi op de Crassier vun Éilereng gouf awer duerch en Amendement aus dem Text erausgehall. Effektiv risquéieren dës Aarbechten a Verzuch ze kommen, well d'Fro vun der aktueller Aklasséierung vun deem Site net kloer ass, well de Klassement als eng „Zone d'études“ vum administrative Gericht annulléiert gouf. Et misst also eng Modifikatioun vum generelle Bebauungs-plang, dem PAG virgeholl ginn; wat ëmmer

mat gewëssenen Délaie verbonne ass. Et kéint also bis 2010 daueren, bis alles duerch den Intanzewee gelaf wier.

Esou gëtt schlussendlech proposéiert, dass d'Testinstallatioun fir d'Behandlung vum Material op de Site Belval an de Perimeter vun ArcelorMittal sollt gesat ginn. Dat behandelt Material kéint dann deelweis als Ënnerbau vun de Stroosse vum Site benotzt ginn. Et kéint awer och fir eng Verdichtung vum Helleg-Geescht-Plateau benotzt ginn, esou wéi initial virgesinn.

Dann zum Avis vum Statsrot. A sengem éischten Avis vum 20. Mee 2008 huet de Statsrot säin Accord de principe zum virleiende Gesetzesprojet ginn. Bei den Diskussiounen vum Gesetzesprojet huet d'Bautekommissioun alle redaktionelle Remarquë vum Statsrot sengen zwee Avisë Rechnung gedroen, bis op déi vun der Ännerung vum Titel; doduerch wier nämlech d'Harmoniséierung vum Text par rapport zum éischte Gesetz vum Package a Fro gestallt ginn.

Déi héich Kierperschaft bedauert ins-gesamt, dass de Gesetzesprojet kee Wuert verléiert iwwert de Stand vun den Aar-bechte vum éischte Gesetz an ob déi finan-ziell Enveloppe agehale konnt ginn. Grad-esou vermësst se Informatiounen iwwert den Zäitplang an de Käschtepunkt vun der drëtter Phas vum Bauprojet a weider iwwert d'zäitlech Ofstëmme vun den Aarbechte vum öffentlechen Transport.

Dann hätt de Statsrot och nach gär gewosst, wat d'Plus-value wier vun den In-vestissementer am Kontext vum Mobilitéits-konzept a vum „modal split“. Esou hätt d'Rentabilitéit vun där héijer finanzieller Ausgab - déi kéint bis iwwer 300 Milliounen Euro leien, eleng wat d'Investissementer ubelaangt, ouni déi parallell Investissemen-ter an den öffentlechen Transport matze-zielen - besser kënnen ageschätzt ginn.

Den Här Bauteminister konnt jiddefalls een Deel vun de Suerge vum Statsrot ver-dreien, wéi e matgedeelt huet, dass déi éischt Phas vum Bauprojet déi finanziell Enveloppe sécherlech net géif sprenge, mä éischer bei 60 Milliounen Euro géif leien, amplaz vun deene virgesinnene 76 Milliounen Euro.

Och den Tunnel ass esou wäit fäerdeg, an d'Soumissioun fir deen zweeten ënnerier-desche Passage ass um Punkt, fir lancéiert ze ginn. Och kéinten d'Aarbechte vun dem virleiende Gesetzesprojet uganks vum nächste Joer ufänken a bis 2011 daueren.

D'Opdeelung vum gesamte Projet an dräi Päck huet hei grad eng besser finanziell Planung erméiglecht, laut der Meenung vum Bauteminister. De Minister huet och dorop higewisen, dass d'Kontrollkom-missioun vun der Exécution budgétaire all sechs Méint iwwert de Stand vun den Infra-struktuur-arbechten informéiert gëtt.

Här President, Dir Dammen an Dir Hären, erlaabt mer nach zum Schluss e Merci ze soen, un éischer Stell de Mataarbechter vum Greffe an aus der Fraktioun, mä och dem Här Bauteminister a senger Verwaltung fir déi konstruktiv Zesummenaarbecht.

Ech ginn och heimat den Accord vun der CSV-Fraktioun zum virleiende Projet. An lech Merci, Dir Dammen an Dir Hären, fir Är Opmierksamkeit.

**» Plusieurs voix.** - Très bien!

**» M. le Président.**- Merci, Madame Rapportrice. Den honorabelen Här Berger huet d'Wuert.

**Discussion générale**

**» M. Eugène Berger (DP).**- Merci, Här President. Léif Kolleeginnen a Kolleegen, ech wéilt och der Rapportrice Merci soe fir hiren ausféierleche schrëftlechen a mënd-leche Bericht. Dat wäert mir et dann er-laben, fir e puer kleng Bemierkungen nach ze maachen an net méi en détail op de Projet anzegoen.

Dee Projet, dee mer haut de Mëtteg disku-téieren, ass eng weider wichteg Etapp am Hibleck op d'Entwécklung vun den Indus-triefriichen op Esch/Belval, well mat deem virleienden Text gëtt déi zweet an ofschléis-send Phas vun der Haaptverkéiersoder um Site vun Esch/Belval realiséiert an eist Auto-bunnnetz un dat franséisch ugebonnen.

Et ass also e Projet, deen eng regional Dimensioun huet, well et dorëms geet, fir d'Industriebroochen erëm ze revalori-séieren, mä doriwwer eraus huet en och eng national Enverchure.

D'Diskussiounen iwwer eng Ubannung vum Lëtzebuurger Stroosserobéau, dat heescht vun der Escher Autobunn un de fran-séischen Autobunnréseau, ass am Prinzip keng nei Iddi. Et ass eng laang an eng